



5

L. alio

Levent



IUSTI LIPSI
DE VESTA
ET
VESTALIBVS
SYNTAGMA.



ANTVERPIÆ,
EX OFFICINA PLANTINIANA,
Apud Ioannem Moretum.

CLD. IDCIIL
Cum Privilegiis Casareo & Regio.

B^o 17. 3. 27.

ILL^{MO} ET REV^{MO}
MATTHIÆ HOVIO
ARCHIEPISCOPO
MECHLINIENSI.



XIGVVM aliquid, & pænè ve-
rens, aut certe verecundans, ad
te adfero ILL^{MA} PRAESVL, illud
DE VESTA ET VESTALIBVS:
quod tamen solus titulus ex-
cusset, non enim dicam com-
mendet. Res sacrorum est: vanorum & vete-
rum, fateor: sed sacrorum, & quæ nostris
etiam piis verisque sacris faciant illustrandis,
aut approbandis. Illustrandis, quia multa su-
per eâ re in scriptis olim Doctorum nostro-
rum; approbandis, quia cùm illi tantum ho-
norem paucis istis coâctisque à pueritiâ vir-
gunculis detulerint; quid nos æquum verum-
que est facere, in deuotis Deo puellis, ætate
adultâ, voluntate præuiâ, quæ diuino cultui
corpus atque animum manciparunt? Beata
virginitas, quæ cum angelis de gloriâ certat:
certat? imò superat, virtute, non felicitate.
quia illorum tota à Dei munere est. istarum
ab electione; sine pugnâ aut labore, illas ista, à
* 2 certa-

certamine parata; & quæ laudem habere, illa
admirationem tantum potest. Iam in veteri
Româ, sex aut septem Vestales, tot præmiis
aut præconiis insignes: istæ quid? aulim asse-
rere, in solâ Belgicâ supra sex septem millia
esse, nec fatis etiam dixi. O *illustris portio* (Cy-
priani verba agnosce) *gregis Christi!* ô flos
nunc in terrâ religionis, lucida sidera olim
in cælo: quàm vndique vana & profana illa
superamus, veritate, aut frequentia? Accipe
igitur VESTALES veteres, sed in illis nostras
feliciores cogita; accipe tu PONTIFEX meri-
tò, quod Pontificiæ olim & nunc curæ com-
missum. Certè tu non solum sacris nostris in
Belgicâ rector & director præsides; sed huius
virginei cœtus tua inspectio & arbitratio est.
tu ducere, formare, coërcere pontificium ha-
bes; & tot millia, quarum precibus salus pu-
blica nititur, tuâ auctoritate & tutelâ nitun-
tur. Non te mouebit, quòd multa, imò ple-
raque ista, prisce litteraturæ sint: ne cense,
optime Antistes, alienam à Christianis vsi-
bus: imò ornamentum, imò adiuumentum
hæc talia, germanæ Pietatis. Vides Græcos La-
tinosque illos religionis nostræ Duces aut si-
gniferos? plerique omnes hac doctrinâ non
insigniti tantum, sed insignes fuere: Tertul-
lianus, Cyprianus, Ambrosius, Augustinus,
Hiero-

Hieronymus: & è Græcis, Clemens, Iustinus, Basilius, Gregorij, & quotquot ex illo aureo ævo est nominare. Cur diffugimus hodie aut damnamus? Neque enim solum voluptatem ex istis aut scientiam probi prudentesque, sed vsum quærunt. & vt floribus alij ad odorem aut ad spectum tantum, apes ad mellificium, medici etiam ad salutem vtuntur: sic illi amœniora hæc studia traducunt & aptant ad serium animorū fructum. Quæ iacent valde, vt pleraque honesta, in publicâ hac tempestate & bellorum nimbis: sed tu ac tales (nam & hæc tua cura est) tuemini atque erigite, & Ecclesiæ dignitatem si saluam vultis, etiam illa. Neque semper profectò hæ procellæ. & erit tempus, quo


—*redeat Concordia, Virtus,*

Cumq; Fide Pictas altâ cernice vagetur.

Deus citò donet: te autem ILL^{us} ET REV^{erendus} PRAESVL, decus & columnam huic statui feruet. Louanij, Idibus Iuniis, ∞. MDCIII.

I. LIPSIVS PP. cliens.

AD LECTOREM.

APE breue hoc Syntagmation, quod est de vetustissimis & celeberrimis item sacris. Quadam alij sparsim super iis libarunt: sed libarunt: nos ordine & methodo rem aperuimus, atque adeò plenè dedimus, ut licuit obliuia ista & fugitiua. Siquid me quoque fefellit, aut fugit: sit Venia. nemo ita industrià aut ingenio potest, ut omnia colligat, intelligat: nec veto, imò posco, ut manum alius addat. Benignè in me consulet, siquis monebit aut suggeret. à te peto tantum,

Ne mea dona tibi studio disposita fideli,
Intellecta priùs quàm sint, contempta
relinquas.

Nam multi indicant, priusquam legerint: quid? etiam priusquam inspexerint quidam. contemptores scilicet honestarum artium, & quorum voto iamdiu Doctrina omnis sit funus. Non audiò Deus, neque solem hunc è mundo tollere.

INDEX CAPITVM.

CAP. I. Quid Vesta? aliis Ignem, aliis Terram esse. de quæ ea prisce fabulæ. pag. 1.

II. Quibusdam & Vencrem dici. Sed Vestam, pro Igne siue Foco, antiquitus & passim cultam: & à quo exemplo Romæ. 5.

III. Numam templum sacrasse, atque id rotundum: viris noctu interdictum. Nulla ibi statua: & tamen vulgò eius imago. 8.

IIII. Aliud ab Augusto Vestæ templum. item de Regiâ, & Arrio Vestæ. 11.

V. Vestales sacerdotes, Virgines captas. quo xuo? quo numero? 14.

VI. Alia in capiendò spectata, seruataque. Sortem, aut Oblationem interuenisse. 16.

VII. Disciplina captarum: gradatio & ascensus: tempora ministerij: & Virgo Maxima. 19.

III. Munera earum, primumque tutela Ignis. Perpetuum hunc fuisse: si defuisset, pœna Virginum & flagra: iterumque instauratio. 21.

IX. Seruabant & imperij pignus, variâ interpretatione: etsi plerique ad Palladium trahant. Quid illud, unde, vbi? 24.

X. Sacra etiam assiduâ faciebant. an & Aquæ curabant? an Draconi? hæc inquisita: & aliquid de Iudæis. 28.

XI. Præmia & priuilegia earum. Ius testandi, Lictor, Carpentum, aliæque data. 31.

XII. Item ornamenta aut insignia: vt Vittæ, Purpura in veste, Stipendia & Agni, Auertentia in deprecando. 34.

XIII. Contrâ, Pœnæ cum peccassent, cum xuo variæ: sed sollennis & nobilis à Tarquinio Prisco. Pontifices arbitros fuisse: conuictam, defossam: & quæ huic rei. 37.

XIIII. Quando Vestales desierint: in Arnobio nodus, nec solutus. 43.

XV. Alibi Ignis cultura, & simulacrum Vestalium. 44.

ADMONITIO.



SCRIPSI, Lector, in fine cap. v. de numero Vestalium, & ex Ambrosij verbis suspicari aliquem posse, ab Augusto vnam additam, septemque factas. Quod adprobare videatur *Fausline Auguste* numus, M. Antonini Philosophi vxoris: in quo templum Vestæ, cum arâ mediâ, & sacrificantes sex Vestales, cum vnâ puellâ etiam, an puero? nam dissident, qui vident. Puellam esse qui volunt, addant hanc Vestalem septimam: paruam scilicet, & adhuc discipulam, nequedum sacrificantem. Atque ita liceat dicere, sex quidem sacerdotes Vestæ fuisse, hanc autem septimam in minore ætate & primo illo decennio, Vestalem quidem, sed nec Vestalem esse. Ideo Ambrosius scitè, *Vix septem*: ad significans, propriè sex eas esse, septimam in disciplinâ agere, & adhuc formari. Tamen qui *Puerum* esse volunt, de senario numero iterum asserant: & similes herclè Numini *Lucille* exstant, cùm sex modò sacrificantibus virginibus, nullâ aliâ minore adstante. Quid, quòd Plutarchus *ad suum vsque æuam* (Traiano Principe, & circâ, vixit) *sex tantum* fuisse adfirmat? Itaque etiam nunc cō inclinamus.

1

IVSTI LIPSI
DE VESTA
ET
VESTALIBVS
SYNTAGMA.

CAP. I.

*Quid Vesta? aliis Ignem, aliis Terram esse.
deque eâ prisca fabula.*



INTER antiquas religiones, eam quae Vestam spectat, comperior vel præcipuam fuisse: Romanis quidem. & ergo ad prisca æui scriptorumque lucem facere, si quis illustrat. Suscepi hoc fine: pergite manus & calame hanc quoque operam nauare iis, quos vetus & melior illa doctrina capit: & simul Sacris quoque nostris auctoribus, qui hæc tangunt in occasione, faciem aliquam præferre. VESTA igitur, plurimum sensu, Saturni ac Rheæ filia, sorores habuit Cererem, & Iunonem, ipsa natu prima: fratres, Plutonem, Neptunum, Iouem. Ita Apollodorus: Ouidius in ordine aliquid mutat,

*Ex Ope Iunonem memorant Cereremq; creatam
Semine Saturni, tertia Vesta fuit.*

A

Nam

Nam Ops eadem, quæ Rhea. Alij tamen dissident, & Vrani siue Cæli vxorem Vestam faciunt: mystica hæc sunt, vt verbo absoluam, variè tradita, sed in re & interpretatione concordant. Nam Cæli vxor Terra fuit: ex iis omnia nata: & Vestam ipsam passim Terram interpretantur. Itaque & cum Cerere quidam confundunt, quæ ipsa est Terra: sed distinguenda, quòd hæc terra dumtaxat fertilis & frugifera; illa (Vestam dico) ea vniuersa. Inde & nomen petunt. vt Ouidius:

Stat vi Terra suâ, vi stando Vesta vocatur:

quasi, quod vi suâ stet & immota libretur. Alij (vt Seruius) quòd variis vestita sit rebus. Ipsa enim (inquit) dicitur esse Terra. Plato huc facit: qui undecim Deos, chorago & præsultore Jove, incedere facit, eiusq; currum sequi: at, inquit, μέν μὲν Ἑστία ἐν τῷ οἴκῳ μόνη: manet & sistit Vesta in Deorum domo sola. Quâ domo? hoc mundo. quod Arnobius explicet: Terram nonnulli Vestam pronunciant, quòd in mundo stet sola, ceteris eius partibus in mobilitate perpetuâ constitutis. Vbi & ipsa Platonis verba expressa. Qui Plato, nescio an hac mente iterum: Ἦν μὲν οὖν Ἑστία τε, οἰκὸς αὖτε ἐστὶ πᾶσι τῶν θεῶν. μὲν δὲ οὐδὲν τέρας ἐστὶ καὶ ἀπεργάζεσθαι τοῖς θεοῖς: Terra & Vesta omnibus diis habitaculum sacrum est: nemo igitur secundaria quadam templa iis instituat. Et videatur hîc distinguere à Terrâ, & Ignem facere, vt mox è Plutarchi verbis discas. Nam hæc quoque crebra imò passiuâ opinio, Vestam Ignem esse. Ouidius:

Nec tu aliud Vestam, quàm viuam intellege flammam.

III. De
Legib.

Vox Græca adsonat, qui ἑστία Focum, siue ἑκαταπύρην appellant. Cicero: Cumq; Vesta quasi focum urbis, vi Græco no-

mine

mine est appellata, complexa sit. Iterumq; alibi: *Vesta* no-^{11. De Nat.}
 men sumptū est à *Gracis*. ea enim est, qua illis *Εστία* dicitur:
 visq; eius ad aras & focos pertinet. Seruius pariter, ad il-
 la Virgilij: *Cana Fides, & Vesta*: *Vestam*, inquit, *Reli-* In 1. En.
gionem dicit. quia nullum sacrificium sine igne est, ipsaq;
 in omnibus inuocatur. *Vesta* autem dicta dñō tñs *Εστίας*,
 ut digammos sit adiecta: sicut *Er, Ver, Enetus, Vene-*
tus. Est igitur ista quasi *Publicus focus*, sicut priuatim in
 ædibus alij consecrantur: eoq; haud absurdè Macro-
 bius, *Vestam* inter *Deos Penates*, aut certè comitem eo-^{111. Sat. cap. 1111.}
rum, recenset. Sed quomodo *Vesta*, *Ignis*? duplex opi-
 nio. Prior ad ipsam Terram restringit & refert: in quā
Phurnutus. quòd vis ignea, inquit, qua in mundo est, hinc
 nutriatur, ac per hanc subsistat: aut, quòd fecunda Ter-
 ra etiam animalium sit mater, quibus vis ignea vita est
 caussa. A priore illā causā Dionysius est. qui *Vesta* idè Lib. 11. Antiq.
 sacrari *Ignem* tradit, ὅτι γὰρ τε οὐρα ἡ θεὸς, καὶ τὸν μέσον
 κατέχουσα ἔχουσιν τόπον, τὰς αἰθέρας ἔμεταστὶς ποιεῖται
 πρὸς ἀφ' ἑαυτῆς: quòd cūm *Vesta* sit *Terra*, atque ea
 medium mundi locum sortita, accendat è sese superiores
 illos ignes. Nota sententia plurium veterum, c Terræ
 vaporibus aurisq; sidera nutriri & exardere. Hac ipsā
 mente fabula, *Vestam* nutricem *Iouis* esse, Marciano
 Capellæ scriptum. Aliter paullo Pythagoræi, qui *Ignem* Lib. 1. Philoh
 medium, non Terram faciebant (nobilissimum quippe
 elementum in loco tali esse debere) atque ipsum *Vestam*
 dici, & custodiam *Iouis* appellari. Aristoteles hæc tan-^{11. De Cælo, cap. 2111.}
 git: & plenissimè exsequitur Plutarchus, qui lucem ei
 donet. Dicitur, inquit, *Numa Vesta* adem orbiculari In Num.
 formā igni perpetuo custodiam circumiecisse, non ut ad-
 similaret

similaret Terræ figuram, tamquam ea *Vesta* esset, sed
 vniuersi huius Mundi, cuius medium Pythagorici Ig-
 nem esse arbitrantur: atque id *Vestam* appellant, & *Vni-
 tatem*. Terram autem neque immobilem esse, neque in
 medio circumlationis sitam; sed in orbe circum ignem
 suspensam, neque inter eximias aut primas mundi par-
 tes censendam. Eadem Platonem volunt iam senem sen-
 sisse de Terrâ, tamquam in alio loco sitâ; mediam autem
 dignissimamq; regionem alteri alicui præstantiori conue-
 nire. Summa horum, Terram mediam non esse, Ignem
 esse: atque hunc *Vestam* dici. Sed altera Phurnuti opi-
 natio; in Terrâ ipsâ mixtum esse Ignem. pro quâ & Ser-
 uius: *Vesta* enim dicitur esse *Terra*, quam *Ignem* habere
 non dubium est, ut ex *Ætnâ* *Vulcano*q; datur intelli-
 gi. Atque hoc quidem satis *παχυλως: cum & aliter con-
 stet, Terræ passim mixtos genitabiles quosdam & vita-
 les ignes. Vides opiniones duas, siue Ignem esse hanc
 Deam, sed sensu vario; siue Terram ipsam. & pro hac
 etiam Euripides:

Καὶ γαῖα μήτηρ, ἑστία δ' ὅ σ' εἰ σοφοί

Βεβητὸν καλοῦσιν, ἡμῖν δὲ ἐν αἰθέρι:

Et Terra mater, Vesta qua sapientibus

Agnominaris, ipso in aëre & sedes.

Itaque magistri Græci deriuant *Ἑστία* παρὰ τὸ ἑσθαι,
 ὃ ἐστὶν ἰδρύσασθαι. ἢ παρὰ τὸ ἑστάναι, ὃ ἐστὶν ἐν ἐνὶ τόπῳ ἰδρύσθαι.
 Sunt qui *Statam matrem* (in Festo) hanc eandem opi-
 nentur: sed opinentur.

CAP. II.

*Quibusdam & Venerem dici. Sed Vestam, pro Igne
sive Foco, antiquitus & passim cultam: & a quo
exemplo Roma.*

ISTA igitur Vesta est. nam Augustini traditio, ut
fidem habeat, vix exempla, *Vestam etiam Ve-*
nerem dici. Ita enim ille: *Quis ferat, quod cum* De Cinit.
lib. iiii.
cap. x.
tantum honoris & quasi castitatis Igne tribuerint, ali-
quando Vestam non erubescunt etiam Venerem dicere?
An quia Ignis est, & tale Venus? an quia (ut Macrobius
scripsit) Physici terra superius hemispharium, cuius par- r. Saturn.
cap. xxi.
tem incolimus, Veneris appellatione coluerunt: inferius
verò Proserpina? Sed hæc longinqua, aut aliena: magis
illud Apollodori, unam è quattuor Hesperidibus Vestam ii. Bibl.
esse. Nihil ad nostram. quæ Græcis Latinisque culta,
inter præcipua numina, fuit: atque ad eò inter duodecim
illa prima. Pausanias, de sacrificiis quæ sollemniter in
Olympiâ fiunt: *Θύουσι γ' ἐς τὰ μὲν πρῶτην, δὲ δεύτερην τὴν Ὀλυμ-* Lib. v.
πίω δὲ: *Sacrificant Veste primùm, tum secundo loco Ioui*
Olympio. Phurnuti nota huc facit: *Vesta, inquit, prima*
& postrema nata perhibetur, quod in hanc (id est Ter-
ram) resoluantur quæ ab eâ producuntur; & ab eadem
constituuntur. Quare & Græci ab illâ sacrificiorum prin-
cipium sumpserunt, & in illam postremò desinebant. Tra-
dit & Servius, *Nullum sacrificium sine Igne esse, Vê-*
stamq; in omnibus inuocari. Ad principium, alludere ali-
quid Ovidij. illud videatur:

A 3

-inde

-- inde precando

Dicimus, o Vesta qua loca prima tenes.

11. De
Nat. deor.

Et si ipse ad vestibulum, ubi olim Focus, refert. De postremo autem loco, sic & Cicero: *Vis autem Vesta ad aras & focos pertinet. itaque in eâ Deâ, qua est custos rerum intimarum, omnis & precatio & sacrificatio extrema est.* Virgilius servauit:

1. Georg.

Dij patrij indigetes, & Romule, Vestaq; mater.
Velleius: *Iupiter Capitoline, Gradive Mars, perpetuorumq; custos Vesta ignium, vos publicâ voce obtestor.* Et alius alia exempla obseruet. Sed ad Romanam propriè Vestam ut veniamus (id institui:) unde ei exemplum, & quando origo? Exemplum à Troianis, atque vnâ cum Æneâ in Italiam venit. Nam primitus culta in Illo, extulitque Æneas. Virgilius:

Sic ait, & manibus vittas Vestamq; potentem,
Æternumq; adytis effert penetralibus Ignem.

111. De
Ciuit. cap.
xviii.

Elatam Lauinij constituit, conditâ à se vrbe, & sede regni. Inde in Albam Longam transtulit Ascanius: & denique ab vrbe eâ matrice coloni Romam. Hoc est, quod Augustinus tetigit: *Sacra illa fatalia (Vestæ) qua iam tres, in quibus fuerant, presserunt ciuitates.* Tres iam dictas, mali nempe fati, nec diuturnas. Prudentius ambiguè, vel ad Troiam, vel Athenas refert:

11. aduer.
Symmac.

- in his quoniam Vestalis origo fauilla
Vrbibus, ut memorant, primo de fomite sumpta est:
Sacrauitq; focos aut Phryx, aut Graius, alumnos.
Et Athenis quidem Ignem cultum, mox dicam: sed propior tamen certiorque origo à Troianis, & Albâ: imò inansit sacrum Albæ, etiam si Roma iam accepisset. No-
tandum

tandum est. & Iuuenalis ita intellegendus:

Ignem Troianum, & Vestam colit Alba minorem.

Scholiastes ibi vetus: *Romanos Tullo rege mouere ea sacra, & transferre voluisse: sed magnam lapidationem de calo factam. Et iussi*, inquit, *ex libris Sibyllinis Pontifices ex Sc. sacra Alba renouare inde ibi perseveranti deo. & Vestam minorem dixit, ad compositionem.* Ecce, Tullo rege, notum Albam dirutam, & ciues Romam traductos: tamen sacra illa Vestæ ait Scholiastes mansisse, monitu diuino, & lapidatione territos amouere. Addit & de *libris Sibyllinis*: quid? an sub Tullo? non tunc erant, & consensu ad Tarquinium Superbum acceptos custoditosque eos referunt: ideoque post ex Sc. liberâ rep. putem renouationem eam iussam. Additque, *perseuerasse.* quod clarius in eo meliusque scribas: *renouare.*

Inde ibi perseverant. ideo & Vestam. Sanè perseuerarunt, etiam Symmachi æuo: atque ille in epistola quadam: *Incestum Primogenie, apud Albam Vestalis antisistitis.* Iterumque in epistolâ sequenti. Igitur etsi Romam inde traducta, non tamen Albæ sacra esse desierunt: sed quando traducta? Plutarchus ambigit: & *Fama est*, inquit, *Romulum etiam Ignem sacrum instituisse, & Virgines legisse, quas Vestales vocant: sed alij tribuunt hoc Numa.* Propertius quidem palàm Romulo, de Tarpeiâ, quam facit sacerdotem Vestæ:

Et satis una mala potuit mors esse puella,

Qua voluit flammâ fallere Vesta tuas?

& passim; totâ Elegiâ. Sed Dionysius abijt, atque adeò refellit, aitque: *Romulum dumtaxat focos singulis cuiuslibet constituisse, nullum Vestræ publicum, memorem dedecoris,*

Lib. ix.
epist. cxx.

In Romulo.

Lib. ii. i.
eleg. ii. i.

Lib. ii.

De Ha-
tusp. resp.

coris, quod mater in Dea eius sacerdotio subisset. Argumentum huic rei certum, quod Vesta ades sita sit extra Romam quadratam, quam Romulus condidit: non futurum, si ille auctor. Nam publicum, inquit, focum solent omnes in præcipuâ urbis parte collocare. Tamen & Cicero in priorem ire videatur: Quod sacrificium tam vetus est, quàm hoc (Vestaliū) quod à regibus æquale huic urbi accepimus. Si æquale, ergo à Romulo. Sed tamen communior fama ad Numam refert. de quo Liuius: Virgines Vesta legit, Albâ oriundum sacerdotium, & genti conditoris (ob Iliam scilicet) haud alienum. Idem Dionysius, Plutarchus, alij.

CAP. III.

Numam templum sacrasse, atque id rotundum: viris noctu interdictum. Nulla ibi statua: & tamen vulgò eius imago.



ATQUE adeò Templum Vestæ instituit, & quidquid ad certum & sollempnem eius cultum. Id fuit situm inter Capitolium & Palatium, medio ferè spatio: disertè Dionysio scriptum, & extra Romulæam urbem, quæ radicibus Palatij ferè terminabatur. Indicat & Liuius: In Noua viâ, ubi nunc sacellum est, supra adem Vestæ. Nam via hæc Noua ex Palatij parte, iuncta Romano foro: & in Fori parte ipsa ædes. Condidit Numam anno urbis quadragesimo, id est regni sui secundo. quod Ouidius ita notat:

v. Fastor.

Dena quater memorant habuisse Palilia Romam,
Cum flamma custos urbe recepta Dea est.

Regis

Regis opus placidi, quo non metuentius ullum

Numinis ingenium terra Sabina tulit.

Ostendit deinde olim vile, nunc ære & marmore nituisse. Ære, in tecto: sed ut opinor, aurato.

Quæ nunc arenitent, stipulâ tum tecta virebant,

Et paries lento vimine textus erat.

Addit, rotundam olim & tunc fuisse.

Forma tamen templi, quæ nunc manet, antè fuisse

Dicitur: & forma causâ probanda subest.

Causam addit plusculis versibus, quia Vesta Terram notat, Terra autem rotunda. Quod ipsum in Festo:

Rotundam adem Vesta Numarex consecrasset videtur,

quod eandem esse terram, quâ vita hominum sustineretur, crediderit, eamq; in pilæ formam esse, ut simili templo

Dea coleretur. Seruius amplius suggerit, Adem hanc potius quàm Templum fuisse, neque inauguratum à Nu-

mâ, ne Senatus ibi haberi posset. Et si tamen nefas nō fuit viros intrare, sed penetrare. Dionysius indicat: qui scri-

bit, de die patuisse OMNIBVS, at PERNOCTARE fas fuisse nemini masculo. Docet & Neronis factum (in Ta-

cito) qui super profectione suâ veneraturus deos, adiit xv. Annal.

Capitolium, & Vesta quoque templum iniuit. Sed & Piso (apud eundem) peruasit in adem Vesta. Viri igitur

intrabant, sed non pernoctabant, neque ad intima, ut dixi, penetrabant. Ideò Metellus Pontifex, sacra ab igne

erepturus, apud Ovidium profatur:

Sacra vir intrabo, non adevnda viro.

nempe illa penetralia, & quò solæ Virgines ibant. In hac autem æde negant simulacrum ullum fuisse. Ovidius:

Esse diu stultus Vesta simulacra putavi,

B

Mox

Mox didici curuo nulla subesse tholo.

In Corinth.

Simile in Græciâ. Pausanias: παρελθοῦσι δ' ἐς τὸ ἱεῖος, ἄγαλμα μὲν ἐστὶν οὐδὲν, βωμὸς δ', καὶ ἐπ' αὐτοῖς θύουσι: *Progre-
dientibus in Vesta, simulachrum nullum occurrit, Ara
tantum, & in eâ Vesta sacrificant.* Caussam Fasto-
rum ille conditor reddit:

Ignis inextinctus templo calatur in illo,

Effigiem nullam Vesta nec Ignis habent.

Quæ ut ita sint, tamen Vestæ imago passim in Nummis
aut Statuis expressa; hodieque exstat. Plinius sedentem
effingi solitam ostendit, à stabilitate: sed Nummi hoc
amplius, & sedentem exprimunt, & alterâ manu fa-
cem, alterâ discum siue pateram libatoriam præferen-
tem: cum inscriptione, VESTA. P. R. QVIRITIVM.
De Face, ad ignem pertinet: de Disco, ad sacrificia sol-
lenniter & perpetim oblata. Suidas Tympanum ei tri-
buit: nescio an in veteribus spectionibus obseruatum.
Γῆς ἄγαλμα. inquit. γυναικα πλάττουσι τὴν ἑστίαν, οἷον αἱ
τὴν γῆν τύμπανον βασιάζουσιν, ἐπεὶ δὴ τοὺς αἰέτους ἢ γῆ ὑφ'
ἑαυτὴν συγκλείει: *Terra effigies. mulierem formant Ve-
stam, tamquam Terram, Tympanum praferentem: quo-
niam ventos terra intra se concludit.*

CAP. IIII.

*Aliud ab Augusto Vesta templum. item de Regiâ,
& Atrio Vesta.*

ATQUE hoc Vestæ igitur templum: éstne aliud? aliud, Falsum, & Verum. Falsum, quod antiquarij hodie adtribuunt, ad Tiberim, iuxta Forum Piscarium, sub Auentino. Ædicula exstat; formâ rotundâ, & extra murum interiorem columellæ XVIII. velut porticum formant. Quia rotunda, quia extra pomerium Romuli, faciunt veterem illam Numæ esse. Falli arbitror. nec assertor huic opinioni, in isto quidem loco, erit: & quis nescit aliorum quoque Deorum templa sæpe eâ formâ fuisse? Quod autem extra Romuli pomerium: valdè quidem, etiam extra Numæ: sed antè docuimus, hanc veram à nobis descriptam, item extra finitionem illam fuisse. Ergo hæc valeat: altera est vera, & à me eruenda, in Palatio collocanda. Ouidius in extremâ Metamorphosi palàm de eâ:

*Vestâq; Casareos inter sacrata penates,
Et cum Casareâ tu Phœbe domestice Vestâ.*

Viden' duo numina in Palatio dicata, Vestam & Apollinem? Quod idem poëta clariùs etiam, in Fastis:

*Auferi Vesta diem. cognati Vesta recepta est
Limine: sic iusti constituere patres.*

Phœbus habet partem, Vesta pars altera cessit:

Quod superest illis, tertius ipse tenet.

Diem quartum Kalendarum Iunij, inquit, *Vesta aufert.*
Quare? suntne tunc Vestalia? non illa prisca quidem,

Lib. IIII.
extremo.

Lib. VI.

quæ incidunt in quintum Idus Iunij, ipso Ouidio attestâte, & marmoreis Fastis. Nam in his hodie insculptum eo die legitur, VEST. NF. PR. quod significat, VESTALIA. NEFAS PRÆTORI. Prior autem ille dies iisdem Fastis in Aprili non signatur: quia nouellus, & dedicationis modo index. Nam Augustus, cum omnino in Palatio habitare vellet, & mos tamen ac cærimonia haberet Pontificem Max. in domo publicâ, iuxta Vestæ, habitare: ipse Vestam potius ad se transtulit, & Sc. partem domus suæ publicauit, atq; alteram illi consecrauit. Ouidius notat, Patres ita censuisse: qui scilicet proni tunc valdè in Principum desideria siue affectus. Et poëta quidem clarissimè: sed & in aliis scriptoribus sunt quæ eò ducant.

L. L. IIII

Επειδὴ τε τὸ λεπιδὸν μετὰλλάζοντος ἀρχιερεὺς ἀπεδείχθη, αὐτ' οἰκίαν πρὸς δημοσίαν ἔλαβεν, ἀλλὰ μὲν οὐ τὴν αὐτὴν, ὅπ' τὸν ἀρχιερεὺς ἐν κοινῇ πάντας οἰκεῖν ἐχρήν, ἐδημοσίωσε: *Postquam Lepido mortuo Pontifex max. designatus est (Augustus) nullam domum publicam accepit, sed partem suæ, quoniam omnino Pontificem in publico habitare oportebat, publicauit.* Imò non partem tantùm,

Lib. LV.

sed mox totam. Ita enim idem scriptor: Ο ἅ αὐγους τὴν οἰκίαν οἰκοδομήσας, ἐδημοσίωσε πάντας, εἴτε διὰ τὴν σωτέλειαν τὴν παρὰ τοῦ δήμου οἱ γυνομένην, εἴτε ὅπ' ἀρχιερεὺς ὡς, ἢ ἐν τοῖς ἰδίοις αἰμα καὶ τοῖς κοινῇ οἰκίῃ: *Augustus domum cum ex edificasset, totam publicauit: siue quia collato ære à populo struxerat, siue quia Pontifex max. cum esset, ut in propriis simul & publicis adibus habitaret.* Secunda causâ verissima est. Suetonius, de Iulio Cæsare:

Cap. XLVI

Habitaui primò in Suburrâ, post autem Pontificatum max. in Sacrà viâ, domo publicâ. Agnosce siue

Domum

Domum publicam in Pontifice? & quidem Sacra viâ: an non in *Regiâ* ipsâ? Ita enim præire idem ille Dio, bonus ad antiqua ductor, videtur, post superiora illa è libro LIIII. verba. Nam addit: Τὴν μὲν τοῦ βασιλέως τὰν ἱερῶν ταῖς ἀπαρθένοις ἔδωκεν, ἐπεὶ ὁμοῖοι & ταῖς οἰκήσεσιν αὐτῶν ἔω: Nihilominus illam, qua Pontificis erat, *Regiam Vesta Virginibus* dono dedit, ut qua contigua earum adibus esset. Itaque olim in *Regiâ* habitabant, in propinquo, & velut inspectores Virginum arbitrique, ut mox dicam: sed Augustus spreuit (parua enim hæc *Regia*) & colorem publici loci in priuato quæsiuit. * Alibi etiam de hac Principum domo publicâ meminisse me legere, & adnotare, nec ab alio fonte. At monui, exiguam hanc *Regiam* fuisse. Ita palam Ouidius:

Hic locus est Vesta, qui Pallada seruat, & ignem:

Hic fuit antiqui regia PARVA Numa.

Meminit Cicero: *Nuper quidem ad Regiam me panem* confecit. Horatius:

Vidimus flauum Tiberim, retortis

Littore Etrusco violenter undis,

Ire deiectum monumenta Regis

Templaq, Vesta.

Lib. I.
Odar.

Ibi Scholiastes: *Regiam* dicit *Numa Pompiliij*, qui ad *Vesta* suam habuit *regiam*. P. Victor, in descriptione vrbs: *Regia Numa, & Templum Vesta*. Ibidem & *Atrium Vesta*; quod *Regiæ* huic adiunctum. etsi Ouidius confundere videatur:

Hic locus exiguus, qui sustinet atria Vesta,

Tunc erat intonsi regia magna Numa.

Nempe & ille locus pars *Regiæ* erat: non ipsa illa tota.

Lib. 1.
cap. xii.

Hoc Atrium Virginum habitationi seruiebat, vt Regia propriè dicta Pontificum. Agellius: *Virgo Vestalis simul est capta, & in Atrium Vesta deducta*: sicut nupta in domum. Plinius: *Virgines cum vi morbi Atrio Vesta coguntur excedere, matronarum cura custodiaq; mandantur*. Obserua igitur illic egisse: sed vi morbi exisse, quia locus scilicet parum latus, nec ægrorum curæ. Etsi maior tamen, iam ab Augusto, Regiâ etiam, vt dixi, iis concessâ: sed neque sic amplius.

C A P V.

Vestales sacerdotes, Virgines captas. quo auro? quo numero?



SATIS de ipsâ Deâ, & templo: de ministerio alioque eius cultu videamus. Ministræ Vestales fuere, atque eæ Virgines. In Ouidio duplex causâ. Prior, quòd Iuno & Ceres, sorores Vestæ,

Vtraque nupserunt: amba peperisse feruntur:

Restitit impatiens de tribus vna viri.

nempe hæc Vesta. Ergo,

Quid mirum, virgo si virgine læta ministrâ,

Admittit castas in sua sacra manus?

Altera causâ, quòd Vesta Igñis, qui nihil gignit,

Nataq; de flammâ corpora nulla vides.

Jure igitur virgo est, quæ semina nulla remittit,

Nec capit: & comites virginitatis amat.

Cicero & duas alias dedit: *Vesta colenda*, inquit, *virgines præsumunt, vt aduigiletur facilius ad custodiam ignis: & sentiant mulieres, in naturâ seminarum omnem castitatem*.

tatem peti. Aduigilent faciliùs. quare? quia liberæ à viro, prole, aliis curis. Castitatem peti. quomodo? cùm virgines placere Diis vident, ipsæ, pro parte suâ quæque, sint castæ. Alij libri, *pati* habent, non *peti*. Tum mallem, *mulieres, naturam*. Potest & ab exemplo esse. nam Plutarchus scribit, *in Graciâ quoque, ut Athenis & Delphis, & sicubi seruatur æternus ignis, præesse si non Virgines, tamen Viduas & à viro castas*. Eius ergo Romæ obtinuit, ut paruæ & tenerâ ætate caperentur, certæ pudicitia, & vitij expertes. Labeo Antistius scripsit, *minorem quàm annos sex, maiorem quàm annos decem natam, capi fas non esse*. Prudentius aspicit:

*Ac primum parua teneris capiuntur in annis,
An: è voluntatis propria quàm libera secta
Iusta maritandi condemnet vincula sexus.*

11. contra
Sym.

Et Augustus, apud Suetonium: *Cùm in demortua Vestalis locum aliam capi oporteret, ambirentq; multi ne filias in sortem darent: adiurauit, si cuiusquam neptium suarum atas competeret, oblaturum se fuisse eam*. De ætate, palàm vides: & hoc quoque, egrè parentes in hanc velut custodiam, & adactam virginitatem, suas dedisse. Etsi multæ tamen non erant, nec crebræ istæ lectiones. Nam Numa in vniuersum quattuor eas instituit, cepitque: *Geganiam, Veraniam, Canuleiam, Tarpeiam*: vt nomina hæc à Plutarcho produntur. Duas deinde alias Seruius Tullius addidit, vt Plutarchus: siue ante eum potius Tarquinius Priscus, vt Dionysius adserit. & addit, *ad suam ætatem eum numerum sic mansisse*. Quò fortasse Valerius respexit, cùm de hoc Tarquinio: *Dilatauit imperij fines, cultum deorum nouis sacerdotiis auxit*.
Neque

Epist. 11.
contra
Sym.

Neque enim legere memini, de aliis ab eo sacerdotibus institutis. Ceterum de numero isto, etiam Festus: *Sex Vestales sacerdotes constitutæ sunt, ut populus pro sua quisque parte haberet ministræ sacrarum: quia ciuitas Romana in sex est distributa partes, in primos secundosque Titenses, Ramnes, Luceres.* Vnus Ambrosius aliter, qui septem eas facit. *Quot tamen illis Virgines præmia promissa fecerunt?* (puto, *ferunt*, legendum) *vix septem Vestales capiuntur puella.* An tamen non sex potius ibi rescribendum? an Augustum, qui pleraque sacerdotia numero, etiam Vestale hoc censemus auxisse? Aliud quod suspicer non habeo. nam quod quidam prætendunt aut excusant, *Vestalem maximam* extra senarium illum numerum fuisse, ab Ambrosio autem includi: quis dicit? aut quæ ratio est? Quin vel maximè ea Vestalis, & in ministerio sacrarum solâ ætate anteccedens.

C A P. VI.

Alia in capiendâ spectata, seruatâque. Sortem, aut Oblationem, interuenisse.



QVOD captæ fuerint, vidimus: nunc & Modum capiendi collustremus. Hoc enim verbo sôllemniter utebantur: causamque dat Agellius. *Capi virgo propterea dici videtur, quia Pontificis maximi manu prehensa, ab eo parente, in cuius potestate est, veluti bello capta abducitur.* Cepit primas ipse Numa: & ut Dionysius ait, *ius deinceps capiendi voluit apud Reges esse.* At pulsus Regibus, Pontifex maximus in locum venit: sed non liberâ prorsus electione, legibusque suis adstri-

adstrictâ. E quibus *Papia* fuit (in Agellio) *quâ cauetur*, ^{Lib. 1.}
vti Pontificis maximi arbitrato, *virgines è populo vi-* ^{cap. xii.}
ginti legantur: sortitioq; in concione ex eo numero fiat:
Et cuius virginis ducta erit, vt eam Pontifex max. ca-
piat, eaq; Vesta fiat. Ait primum, *Pontificis arbitratu*
legi. quo sensu? nempe vt ius probandi reiiciendiq; ipse
habeat, & sitne idonea diiudicandi. Nam non *Ætatem*
solum, sed *Genus, Corpus, quæque adhærent*, inspicere so-
lent, & vt omnia apta honestaque ministerio essent. In
Genere quidem, ne, *cuius parentes alter ambòve serui-*
tutem seruissent: aut in negotiis sordidis diuersantur.
Item excusari, *cuius pater Flamen, Augur, Quindecim-*
uir, aut Septemuir, aut Salius est: & talia minuta, quæ
in Agellio legas. In *Corpore*, *ne lingua debili, sensuue-*
aurium deminuta, aliave quâ corporis labe insignita sit.
Quæ adhærent: vt patrima sit & matrima, vt ne eman-
cipata sit: & talia, dicto loco videnda. *Sequebatur in le-*
ge, Virgines viginti. Magno satis numero, ad vnâ dum-
taxat capiendam: sed causa est, vt fors leuior accidat,
sparsa sic per plures. Addit, *E populo.* Toto, inquam,
populo, non è patriciis tantum, sed & plebeiis. Imò verò
Augusti æuo, præter legem moremque veterem, etiam
ex libertinis capte. Dio Cassius: *Επειδή τε οὐ ρεξιῶς οἱ* ^{Lib. lv.}
πάλιν δι' ἡμεῖς τὰς θυγατέρας ἐς τὴν Ἱερῆας ἱεράτειαν ἐπέδω-
σαν, ἐνομοθετήθη καὶ διὰ ἀπελευθέρων γενημεσίας ἱεραῖται:
Quoniam haud promptè ij qui planè nobiles erant, filias
suas ad Vestale sacerdotium darent, Lege statutum est
etiam è Libertinis natas posse capi. Sequitur, *Sortitio-*
nem in concione fieri. In concione, comitiis, puto, *Curia-*
tis: vt coram testibus res fieret, & dignitas sacerdotio

adcrederet dignitate actionis. Sortitio autem adhibita, ut quasi diuinitus legi excerpique è pluribus talis videretur. Facit huc Suetonij illud suprà, *Ambirentq; multi ne filias in sortem darent.* Tangit & Sortem Dio, post superiora illa verba, additque: *cum sortitio facta esset, Libertinam nullam tunc ductam.* Nectamen semper ad Sortem ventum: Oblatio locum habebat, & talis (si apta) præferebatur. In Agellio: *Siquis honesto loco natus adcat Pontificem maximum, atque OFFERAT ad sacerdotium filiam suam, gratia Papie legis per Senatum fit.* Omittitur scilicet, Sc. interueniente, sortitio. Vox Augusti huc spectabat, *Si neptium suarum competeret atas, OBLATVRVM se fuisse eam.* Taciti item narratio: *Retulit Caesar (tanquam Pont. maximus) capiendam Virginem in locum Occia: egitq; grates Fonteio Agrippæ, & Domitio Pollioni, quod OFFERENDO filias, de officio in rempublicam certarent.* Addit deinde in ipsâ oblatione electionem & arbitrium: & *prælatam Pollionis filiam, non ob aliud, quàm quòd mater eius in eodem coniugio manerèt*: id est, vniuira esset. quæ ipsa species aliqua castitatis. Habet deinde lex, *Eam Pontifex Max. capiat.* Atque ipsa verba sollennia, ex libro primo Fabij Pictoris, recenset illustris Noctium scriptor: SACERDOTEM. VESTALEM. QVÆ. SACRA. RACIAT. QVÆ. IOVS. SIET. SACERDOTEM. VESTALEM. FACERE. PRO. POPLO. ROMANO. QVIRITIBVS. Q. VTI. QVÆ. OPTVMA. LEGE. FOVIT. ITA. TE. AMATA. CAPIO. Adiicit Agellius: *AMATA inter capiendum à Pontifice max. appellatur, quoniam quæ prima capta est. hoc fuisse nomine traditum est.* Sed ubi prima capta? Si Roma, &

mæ, & à Numâ: Plutarchus redarguit, qui quattuor nominat, nec vllam inter eas *Amatam*. Sin Albæ, aut Lavinij; hoc nescio, & in medio relinquo.

CAP. VII.

Disciplina captarum: gradatio & adscensus: tempora ministerij: & Virgo Maxima.

SE D iam igitur captæ, & sic puellæ ac teneræ: quid deinde? Disciplina sequitur, & quomodo ad ministeria sua factæ. Deducebantur in Atrium Vestæ, atque ibi à senioribus ad ritus & cerimonias omnes (plusculæ erant) instructæ. Nam in tres velut classes, etsi parvus hic numerus, diuidebantur: Discentium, Exercentium, Docentiumque. Seneca, De Vitâ Beatâ: *Virginum Vestalium more, qua annis inter officia diuisis, discunt facere sacra, & cum didicerint, docent.* Cap. xxix. Dionysius etiam distinctius: *Tempus tricennale manere eas oportet, castas & à nuptiis vacuas, sacra ex more facientes. quo tempore decem annos discere debent, decem sacris operari, decem docere.* Pulchra diuisio: & eadem alibi in Plutarcho. Itaque non nisi xxx. annos obligabantur, & post id tempus licitum nubere; haud pessimâ adhuc ætate. Nam pone ab anno vii. (id licebat) ingressam: ergo anno xxxvii. fas virum quærere, & ætate etiam frui. Ambrosius hoc irridet: *Qualis est ista non morum, pudicitia, sed annorum? qua non perpetuitate, sed ætate præscribitur?* Ergo & interdum nubebant. vt illa in Prudentio,

Nubit anus veterana, sacro perfuncta labore.

Lib. ix.
epist. iiii.
c. vii

etſi antiquitus obſervatum, infauſtas ferè & parum læta-
biles eas nuptias fuiſſe. Sed, vt dixi, non niſi triginta an-
nis obligabantur: antè autem nefas excedere. Ideo Sym-

machus, vt Pontifex, Veſtalem quandam increpat: *Dis ante annos legibus definitos Veſtali ſecreto velle de-
cedere, nondum credo rumori, ſed aſſertionem tua vocis
exſpecto.* Hoc illam tunc ſub Chriſtianis Principibus
auſam opinandum eſt, noſtræ religionis zelo ſiue velo:
ſed olim ſilendum manendumque, aut in mundo pœna
erat. An eadem autem annorum terminatio Albæ, vnde
oriundum hoc ſacerdotium? Dionyſius abnuat, ſi ver-
ba eius germana, de Iliâ: *πενταετὲς ὃ ὅτε ἐλάττω χρόνον*

Lib. i.

*ἔδει ἀγνῆς διαμῆναι γάμων: Quinquennio autem, nec mi-
nus, oportebat à nuptiis caſtas manere.* Itâne quin-
quennio tantum? vanitas: imò *πεντηκονταετὲς, quinquaginta annos*, in Dionyſio legendum, vt lex Albana paul-
lo durior Romanâ etiam fuerit. quod Liuius ſubindicat,
qui tradit de hac ipſâ Iliâ, *perpetuâ virginitate ſpem
partus ei ademptam: &* item Zonaras, qui, *παιρὲν διὰ
βίου, virginem perpetuam* dicit. Conſideretur. ego obſer-
uo, pleraſque ad vltimam ætatem in ſacerdotio perſeue-
raſſe: & exemplum in Tacito, de Occiâ: quam ſcribit,
*ſeptem & quinquaginta per annos ſummâ ſanctimoniâ,
ſacris Veſtalibus præſediſſe.* Ergo xx. circiter annos
manſit, vltra ſuum tempus. Quod *Præſediſſe* ait, non
traho ad dignitatem, & quaſi *Maxima* fuerit (vix an-
ni illi admittant:) ſed omnes *Præſidere* ſacris, itemque
Antiſtites vel *Antiſtite* dicuntur. Liuius apertè, de om-
nibus: *vt aſſidua templi antiſtites eſſent.* & Symma-
chus: *Primogenia dudum apud Albam Veſtalis anti-
ſtitis.*

Lib. ix.

stitis. Et si ordo tamen inter eas fuit, sed ministerij & ætatis. Vna enim quæ vetustissima, *Maxima* dicebatur. Ad ætatem, inquam, id referendum. atque ita Ovidius:

Ignem cremat vitulos, quæ NATV MAXIMA virgo est. 1111. Fast.
 Suetonius, Iulio: *Testamentum eius demandatum Vir-* Cap. LXXX
gini Vestali Maxima. Idem, in Domitiano: *Damna* 111.
tam ab eo Corneliam virginem Maximam: quæ malè Cap. VII.
 in Plinij epistolis, *Cornelia Maximilla.* In lapidibus Lib. 1111.
 sæpe: v. v. MAXIMÆ. quod est, *Virgini Vestali Max* ep. st. XI.
 Quæ ipsa Dioni *πεσσεδοῦσα*: & Tacito, *Vestalium ve-* Li. 1111
tustissima nominatur. xi. Ann.

CAP. IIX.

*Munera earum, primumq; tutela Jouis. Perpetuum
 hunc fuisse: si desisset, pœna Virginum & fla-
 gra: iterumq; instauratio.*

NVMERVM, Capturam, Disciplinam, Ordinem,
 habemus: ad *Munia* earum transeamus. Neque
 enim vacuæ vnquam aut feriatae habitæ: sed plu-
 res frequentesq; operæ, & mireris tam paucas suffecisse.
 Tria præcipua, in quibus deditæ: *Vigilare*, *Adser-*
uare, *Sacrificare*. Vigilia ad Ignem spectauit, quem
 sine intermissione aliopus, & reparari. Itaque *Æternum*
 siue *Sempiternum* dicebant. Cicero: *Virginesq; Vestales* 11. De
in urbe custodiunto ignem foci publici Leg. *SEMPITERNVM.*
 Silius:

*Et vos virgineâ LVCENTES SEMPER in arâ
 Laomedontæa Troiana altaria flammæ.*
 Florus, de Numâ: *In primis focum Vesta virginibus co-*
C 3
lendum

lendum dedit, ut ad simulacrum celestium siderum custos imperij flamma vigilaret. Vult, sicut sidera aeternum lucent, sic debere, virginum assiduâ curâ atque operâ, hunc Ignem. Atque ita erat. Nam ignis σβέσι (ait Dionysius) ὑπὲρ ἅπαντα τὰ δεινὰ ῥωμαῖοι διεδρίκασιν, ἀφανισμοῦ δὲ πόλεως σημεῖον ὑπολαμβάνοντες, ἀφ' ἧς ποτ' οὐδ' αἰτίας γίνεται: extinctionem, super omnia gravia & timenda, Romani timent: interitus aut imminutionis rei publicae id signum interpretantes, à quacumque tandem causâ euenerit. Liuius cum eo: Plus omnibus aut nunciatis peregrè, aut visis domi prodigiis, terruit animos hominum ignis in ade Vestae extinctus. Et miseras Virgines, si euenisset. Nam ignis Vestae (ait Festus) si quando interfectus esset, verberibus afficiebantur à Pontifice. Sed pudore virgineo tamen saluo, in loco obscuro, & velo medio interposito, ut Plutarchus notauit. Exempla autem huius castigationis in historiâ. ut Valerio: P. Licinio Pontifici Maximo virgo Vestalis, quia quadam nocte parum diligens ignis aeterni custos fuisset, digna visa est qua flagro admoneretur. In Liuiio: Ignis in ade Vestae est extinctus, causaque flagro Vestalis, cuius custodia noctis eius fuerat. Nota de Flagro utrobique: quæ seruilis castigatio. nota etiam de custodia eius noctis, ut per vices iuisse videatur, & singulæ suis noctibus dumtaxat excubasse. Quod si autem extinctus; sua & certa ratio accendendi iterum erat: quam Dionysius alibi sedixisse profitetur; sed nempe in libris, quos fatum inuidit. Est ea tamen in Festo: & Mos erat, inquit, tabulam felicitatis tamdiu terebrare, quousque exceptum ignem, cribro aneo Virgo in adem ferret. Quam rationem eliciendi ignis Simplicius

in

Lib. xx.
viii.Lib. i.
cap. i.Lib. xx.
viii.

in Aristotelem etiam agnoscit: *Ἀπὸ ξύλων ὃ πῦρ ἐκβάλλει* ^{111. D. Cælo.}
σι, θάτερον τὰ ξύλων, ὡς τέρετρον, ἐν θάτερον περιερέφοντες:

Ignem è lignis excutiunt, alterum lignorum, tanquam terebram, in altero circumuertentes. Tangit & Isidorus ^{Lib. 11. epist. x.}
Pelusiota: & hodie assidue vsurpant occidui orbis Indi.

Similem cerimoniam Græcis fuisse, Plutarchus tradit: sed paullo diuersam. Nam si quando sacer ibi ignis deuixit, negant eum fas esse ex alio igne accendi, sed nouum parandum eliciendumq; ex ipso Sole. Quod faciunt scaphiis siue vasculis, qua cauata sint aequalibus lateribus reëtangulis trigonis: deuergunt autem ex circumfrentiâ in unum centrum. Cùm igitur Soli opponuntur, ut radij eius in ipsum centrum cogantur & implicentur, aëre attenuato, fomenta leuissima & siccissima apponunt, qua facillimè per renixum & reflexionem concipiant accensum ignem. Hæc ita alibi: Romæ, ut dixi. Addo, etiam sine interstinctione vllâ Ignis, solere nouum accendi, nouo anno. Macrobius: *Primâ die Martij, ignem nouum* ^{Lib. 1. Saturn. cap. x11.}
Vestæ aris solent accendere, ut incipiente anno cura denno seruandi nouati ignis inciperet. Ouidius:

Adde, quòd arcanâ fieri nouus ignis in æd-

Dicitur, & vires flamma resecta capit.

Vterque adducit, & argumentum habet, pro Martio, duce olim anni: ut sciamus annum, cùm Vestales à Numâ institutæ, nondum sic auctum & correctum. Nam Martius certè postea non princeps. Addit Ouidius: ^{111. Fast.}

Vestæ quoque et niteat folio velata recenti,

*Cedit ab fliacis laurea * cana focis.* ^{* id est, vestis}

Eodem illo primo die reliqua scilicet innouabant, & laurus veteres tollebant, nouas surrogabant.

CAP.

CAP. IX.

*Servabant & imperij pignus, variâ interpretatione:
et si plerique ad Palladium trahant. Quid illud,
unde, ubi?*



Lib. xxvj.

ALTERVM Munus dixi fuisse, *Adservare*. Quid
autem? arcanum IMPERII PIGNVS, vt appel-

Lib. ix.

labant. Liuius: *Vesta adem petitam, & aternos*

ignes, & conditum in penetrati fatale imperij pignus.

Lucanus:
— *in abstruso pignus memorabile templo.*

vj. Fast.

Ouidius:

Vidimus Iliaca transferri pignora Vesta.

111. Con-
trou. lib. 1.

Seneca pater: *Veriet ad colendum Romani imperij pi-
gnus carnificis manu incesta?* Quid autem pignus istud
& cuiusmodi fuerit, in arcanis habebant: & ideo variant
auctores. Dionysius ait: Εἰσὶ δὲ ἕντες οἱ φασὶν εἶναι τὸ πνεῦμα
διππρὸς τοῖς πολλοῖς ἰσχυρὰ καὶ ἀνὰ τὸν πᾶν τεύχεα τῶν θεῶν, ὧν
οἷτε ἰσχυρὰ τὸν γένειον ἔχουσιν καὶ αἱ παρθεναί: *Sunt qui*
asserant, prater ignem, arcana & multitudini non effe-
renda sacra, in deo templo esse deposita, quorum Pontifices
notitiam habeant, itemq, ipsæ Virgines. Addit signum
huic rei certum, quod cùm templum olim arderet, L. Me-
tellus Pontifex, trepidantibus Virginibus, irrupisse in ar-
dens penetrale dicitur, & Sacra è flammis eripuisse: id
quod subscriptum statuæ eius in Capitolio legebatur.
Iterumque Dionysius: *Huic rei confessa, addunt conie-*
cturas suas. alij seruari sacrorum partem è Samothraciâ,
quæ Dardanus Troiam, Æneas in Italiam aduexerit:

alij

*alij calo delapsum Palladium, quod verum idem Æneas
adportarit. nam falsum & adsimilatum Achiuos furto
sustulisse.* Hæc ille: videamus. Prima opinio de *Sacris
Samothracum*, quæ & in Plutarcho expressa: *censere* In Ca-
millo.
quosdam, deos Samothracum hic condi. quos cum Penati-
bus alij confundunt. Videaturque Tacitus in hac parte,
vbi de Neroniano incendio: *Numa regia, & delubrum* xv. Ann.
Vestæ, cum Penatibus populi Romani exusta: quasi Pe-
nates ecce illuc asseruati. Sed potest & aliter capi, vt
Vestæ delubrum, itemque Penatium templum, haud
procul inde in Velia, sint exusta. Altera opinio, de *Pal-
ladio*, quæ in vulgus maximè recepta est, & nobile illud
fecit ac decantatum. Quid appellamus? Palladis minu-
tam effigiem, Græcanicâ sermonis formâ. Eustathius:
τὰ τὸ πάλλαδ' αἰὲς ὦλα, παλλάδια τοῖς παλαιοῖς ὀνομάζοντες: In I. Iliad.
Palladis imagines Palladia antiquis appellantur. Mul-
ta super isto multi: Apollodorus intellegendo sufficiet.
A calo hoc delapsum est, & Ilo regi traditum. 111. Bibl. *Erat au-
tem magnitudine tricubitale: habitu quasi ingredientis:
dextrâ hastam sublatam præferebat, sinistrâ fufum & co-
lum.* Exstant in gente Iuliâ Numi, quibus Æneas in-
sculptus visitur, sinistrâ Anchisem humeris tolerans, de-
xtrâ Palladium istud gestans. Itaque plurium, vt dixi, hæc
opinio. Liuij, vt apparet: *Quid de æternis Vestæ ignibus,* Lib. v.
*SIGNO QVE, quod imperij pignus custodia eius templi te-
netur, loquar?* Signo, nempe hoc Palladis. Lucani certè:
- nulliq; adspecta virorum

Pallas, in abstruso pignus memorabile templo.
*Obserua, nulli virorum: solis ergo Virginibus fas vide-
re.* Idem poëta, de Vestali:

D *Troianam*

Lib. I.

Troianam soli cui fas vidisse Minervam.

Sed nec Pontifici Maximo fas: etsi esse sciebat & coli, ex Dionysio supra adstructum. Itaque nec impune Metello fuit vidisse, ut servaret. Plinius: *Metellus orbam luminibus exegit senectutem, amissus incendio, cum Palladium raperet ex ade Vesta.* Ceterum & Cicero in hac sententiâ: *Qui (Brutus) ita conservandus est, ut id signum quod de calo delapsum Vesta custoditis continetur: quo salvo salvi sumus futuri.* Nam ait, *de calo lapsum.* Propertius:

Lib. IIII.
el. IIII.

Palladis extinctos si quis mirabitur ignes,

Ignoscat, lacrimis spargitur ara meis.

Camillo.

Vbi & ipsum cultum ignium Palladi adscribit. Tertiam opinionem licet addere, ex Plutarcho: *Qui plus in his rebus volunt sapere, duo Dolia haud magna recondi aiunt. atque unum ex iis plenum esse, obsignatumque; alterum vacuum. Utrumque tamen Solis virginum oculis usurpandum. Quæ dant & capiunt lucem è Lampridio, in Eligabalo: Qui penetrare, inquit, sacrum auferre est conatus. cumq; Seriam (siue Dolium) quasi veram rapuisset, quam Virgo Maxima falsam monstrauerat, atque in eâ nihil repperisset, applosam fregit.* Sed idem Lampridius an non subindicat in ipsâ Seria Palladium hoc fuisse? Nam de eodem principe, an pecude, ait: *Signum quod Palladium esse credebat, abstulit.* Incerta hæc igitur, & bono religiosoque animo Dionysius: *Ego, inquit, adseruari à Virginibus non Ignem solum, sed & Sacra quedam vulgo incognita, multis inditiis colligo: sed quæ ista sint, neque me, neque alium qui religiose deos & divina colit, inquirere curiosè oportere arbitror.* Atque ipsi sanè

sanè Romani velabant, si non vetabant. Itaque in oper-
to habebant, in adyto & Penetrati, quod *Penum* voca-
bant. Festus: *Penus vocatur, locus intimus in ade Veste
tegetibus septus: qui certis diebus circa Vestalia aper-
ritur. Ii dies religiosi habentur.* De eodem etiam Lam-
pridius: Impius ille Eligabalus *Penum Vestæ, quò sola
Virgines, soliꝫ Pontifices adeunt, irrupit.* Ergo & Pon-
tifices? apparet, sed non ut viderent. Adire, hoc satis iis
fuit. Sed nonne ipse Eligabalus, exemplo omnium Prin-
cipum, tunc Pontifex maximus? certè, & Numi cen-
teni dicunt. Quid ergo Lampridi culpas? hætenus non
potes, nisi quòd abstulit tamen, & conatus videre. Ne-
fas. atque ita Herodianus, ut prodigiosam rem narrat:
quòd Commodi imperio *Vestæ templum arserit, & nu-* Lib. 1.
*dum visum sit Palladium, quod Romani & colunt ma-
ximè & celant: visum, dico, tunc primum post allatum
ab Jlio in Italiam.* Legas, & hæreas. ergone tunc pri-
mum? Atqui & à Metello Pontifice raptum ex incendio,
& conspectum vnà dicas (vnde enim oculi aliter amissi?)
& in Dione scriptum, sub Augusto *Vestam arsisse, &* Lib. 111.
*Virgines Palladium extulisse, ac posuisse in domo Au-
gusti.* Sed dicere licet ac credere, *nudum*, non visum,
quod in Herodiano erat: sed velamento suo, siue Seria,
obductum. Ac talis fortasse in Statio sensus, & allusio:
vbi Tydeus Palladi vota faciens, ait,

Pernigilemꝫ, foci ignem longæua sacerdos

Nutriet, arcanum non inspectura pudorem.

Lib. 17.
Thebaid

Hic Scholiastes vetus: *Arcanum Pudorem dicit, aut eius
simulacrum verum, id est Palladium: quo quidam (Me-
tellus) quondam viso, priuatus est visu: aut virginita-*

tem eius. Etſi magis pro verbis Statij videatur altera interpretatio de *Virginitate*, ſiue Virginal mauis dicere: atque eam partem in hoc ſigno ſemper, religione quadam, obuclatam fuiſſe. Non ita in aliis, quæ nudare, lauare, vngere ſollenne erat. Satis de Palladio. vnum ex Lib.vi. Dionyſio ſubtexo ambigua vel obſcura notitiæ: *Nautium* quemdam è comitibus *Ænea*, ſacerdotem *Minerua* *Vrbica* fuiſſe, eiusq; ſimulacrum ſecum *Troiâ* extuliſſe. quod, inquit, aſſeruabant alij ab aliis ſuſcipientes, quicumque eius gentis eſſent. Eſtne de iſto noſtro, an alio? an iam olim dumtaxat adſeruauit ea gens, ante conditum *Veſtæ* templum? Etſi *Cedrenus* à *Romulo Martis* *adem ſacratam* vult, & in eâ repositum tunc *Palladium*. Quidius etiam de auctore vel aduectore *Palladij* ſatis incertò:

vi. Faſt.

• *Diomedes.*

Seu genus Adraſti, ſeu furtis aptus Ulyſſes,
Seu pius Æneas, eripuiſſe ferunt.*

*Auctor in incerto eſt. res eſt Romana: tuetur
Veſta, quòd aſiduo lumine cuncta videt.*

CAP. X.

Sacra etiam aſidua faciebant. an & Aqua curabant? an Draconi? hac inquiſita: & aliquid de Deo Fonte.

Cap.v.



ERTIVM dixi Munus *Sacrificare*. Atque id adſiduum penè erat, diu noctuque. Seneca, de Pro- uidentia: *Quid porrò? non eſt iniquum nobiliſſimas Virgines ad ſacra facienda noctibus excitari, altifſimo ſomno inquinatas frui? Prudentius:*

Hoo

*Hoc illud meritum est, quod continuare feruntur
Excubias, Latij pro maiestate Palatij.*

11. contra
Sym.

Et in Numis passim Vestalis sacrificans, ipso habitu quem Festus describit: *Armata virgo dicebatur sacrificans, cui lacinia toga in humerum reiecta.* De quo cultu aliquid & idem Festus: *Suffibulum, vestimentum album, prætextum, quadrangulum, oblongum, quod in capite Vestales cum sacrificant, semper habent: idq. fibulâ comprehenditur.* De sacrificiis autem ipsis, aut eorum ritibus, longum & tenue sit hîc dicere: omitto. quod dubium sit, magis inquirò. Etiâne Aquæ Virgines curabât? Ex Suidâ hoc adstruitur: *Νοµας τὰς ἐσιτάδας παρθένους ἔπυρρος ἑὺδάτος τῆς ἐπιμέλειαν ἔχειν προέτερεψε.* *Numa Virgines Vestales IGNIS ET AQUÆ curam habere demandavit.* Totidem ferè verbis hoc legas in Georgio Cedreno. Cur tamen alij veterum silent? aut quæ hæc Aquæ cura? Opinor non aliam, quàm quòd Fonti Camœnarum præessent, ex quæ eo solo aquam ad sacra peterent. Possit sanè aliquis ad Physiologiam referre, quasi duo rerum principia coli Numa voluerit: sed ad rem ritumque firmandum Plutarchus nunc adhibeatur. Ait, *Numam præta & campum, ubi plurimum cum Egeriâ versatus esset, Camænis consecrassê*: tum addit: *τὴν δὲ πηγὴν, ἣ κατάρδει τὸ χεῖρον, ὕδατος ἰερόν διποδεῖσαι ταῖς ἐσιτάσι παρθένοις, ὅπως λαμβάνουσαι καθήμεναι, ἀγνίζωσι καὶ βαίνωσι τὸ αἰάκτερον.* Fontem autem qui locum irrigat, *AQUAM SACRAM Virginibus Vesta attribuisse, ut ex eo COTTIDIE haurientes purificarent & aspergerent sacram adẽm.* Nisi hæc aqua sit, cuius curam gesserint, non reperio: ad cottidianam quidem lauationem illam, scio

& Propertium respexisse, dum de Tarpeiâ Vestali scribit:

Sacra lauaturas mane petebat aquas:

Sat. 11. et si ex alio fonte ea (quippe sub Romulo) sumpsit. Item-
que in Persio hoc fine, *Vestales urnas* legas. Sed ut obi-
ter addam, ille Fons Vestalibus dedicatus, sacer habitus,
& in Deos etiam relatus, delubrum postea accepit. de
quo Iuuenalis:

Sat. 111. *Nunc SACRI FONTIS nemus & DELVBRALocantur
Iudeis.*

111. De Cicero: *Fontis delubrum Maso ex Corsicâ dedicauit.*
Diuinat. Festus: *Fontinalia, fontium sacra, unde & Fontinalis
porta.* Imò singulari (& sic corrige) *Fontis sacra.* Sym-
Lib. 1. machus: *Sed enim prater ea etiam Camænarum religio,*
epist. xiiij. & SACRI FONTIS adnectitur: ita malo, quàm aduer-
titur, ex scriptoris mente. Fuit & alia aqua Vestæ haud
longinqua, Iuturnæ fons & lacus: sed de eâ, quod huc
faciat, nihil legi. Simili in ambage vel nube est, quod in
Siluestri Pontificis Actis quibusdam legitur, *Draconis
eum ora clausisse, & perpetuo ergastulo mancipasse: cui
Kalendis singulis à Virginibus Vestæ suppeditari solita
sint alimenta.* Nam quis veterum tale aliquid? eoque
sperni aut abiici à magnis viris, ut falsâ, video: me cun-
ctante, an non Tertullianus huc adspexerit, hisce verbis:

1. ad Vxor. *Roma quidem, qua Ignis illius inextinguibilis imagi-*
cap. vi. *nem tractant, auspiciæ pœna suæ cum ipso DRACONE
CVRANTES, de virginitate censentur.* Profectò dicis
& Ignem curasse, & Draconem: utrumque in imagine
futurorum. Neque nimis abhorream, talia quædam;
præter morem veterem, nouitiâ superstitione, & causâ
aut casu aliquo, adsumpta: quæ idèò priscis nec dicta.

Draco-

Draconem quidem vnà cum Bonâ Deâ cultum, hoc legi: sed quid ad Vestam? in quâ pergo.

CAP. XI.

Pramia & priuilegia earum. Ius testandi, Licitor, Carpentum, aliâquedata.

MVNIA & labores vidimus: nunc iustè *Pramia* & honores, quibus ad illa excitatæ. Pleraque eorum Plutarchus exsequitur: & siquid deficiet, addam. Ait: *Honores magnos Numa iis tribuit. veluti quòd viuo patre testari possint, atque alia facere sine auctore* (ὅνδ' ὡς αὐτοῦ) *eo modo & iure, quo matribus trium liberorum id permissum. Item licitor pracedit exeuntes. Quòd si reo, ad supplicium qui ducitur, fortuitù facta sint obuia, is pæna liberatur. Oportet autem iurare à casu, non à consilio, fuisse hunc occursum. Qui verò lecticam earum aut sellam quâ vehuntur subit, morte id luit. Hæc more nostro lustremus paullum, & illustremus. Ait primò, ius testandi habuisse. scilicet quia statim exhibant è patriâ aliâque omni potestate: & ætatis deliquium leges benignè supplebant. Adeò vt vel sexennes, id est primo anno quo capte, testari possent. Sozomenus disertim: Οἱ παῖδες ῥωμαίων ἀδελφὲς διατίθεσθαι τὰς ἐπιταφίας παρθένους, καὶ ἐξ αἰτῆς ἑσῶς, ἐνομοτέδισται: Prisci Romani liberè testari Virgines Vestales, etiam sexennes, lege sanxerunt. Addit Plutarchus, *Pramia habuisse, qua trium liberum matres. At reuera non Numa hoc* (neque enim tunc de isto iure) *sed Augustus instituit. quod Dio in loco & anno suo scripsit: Ταῖς, inquit, αἰ-**

1. Eccl.
Hist. c. ix.

Lib. lv.
ωαί-

παρθένους πάντ', ὅσα περ καὶ τεκοῦσαι ἔχον, ἐχαρίσατο: *Vesta virginibus omnia, quæ matres habebant, indulgit.* Alius honos: *precedere & deducere lictorem.* Id quoque non à Numâ, sed Triumviris referunt acceptum. Dio Cassius:

Lib. xlvij. Ταῖς αἰνὰ παρθένοις παῖδούχῃ ἐν ἑκάστῃ χεῖρὶ δάκρυον: *Virginibus Vesta singulis lictore uno uti dederunt.* Et causam siue αἰτίαν addit. quod vna aliqua earum vesperi à cænâ rediens, & incognita, malè habita ac violata esset. Tu-

tela igitur & decus, Lictor additus. Seneca pater: *Procedente hac lictor submovere iubebitur: huic Prator viâ cedit: summum imperium Consules cedent tibi.* In eodem

vi. Contr. alibi: *Tibi magistratus suos fasces submitunt: tibi Consules Pratoresq; viâ cedunt. Numquid exiguâ mercede virgoes?* Attende. omnem honorem huic sacro ministerio, & ipsos Consules cessisse. Quartum in Plutarcho: *morte liberasse, illi addictos.* Credo: sed de Iuramento fortuiti occurfus nodum aut reinoram habet. quomodo enim? cū nec iurare omnino Vestalis deberet? Ita fanè

Lib. x. in edicto Pratoris perpetuo, apud Agellium: *Sacerdotem cap. xv. Vestalem, & Flaminem Dialem, in omni iurisdictione meâ iurare non cogam.* Nec de iuramento controuerto: tamen in foro auditas, & pro testimonio dixisse, Ta-

ii. Ann. citus palàm firmat. *Missus est Prator,* (de Vibullîâ quadam, gratiosâ aulicâ) *quæ domi interrogaret: cū Virgines Vestales in foro & iudicio audiri, quoties testimonium dicerent, vetus mos fuerit.* Venisse igitur in forum, testes adhibitas, liquet: sed, ex Edicti verbis, non iuratas dixisse, nisi si vellent. Nam est in Edicto, *non cogam.* Religionis igitur honore, voluerint vel iniuratis credi. Vltimum in Plutarcho: *Siquis lecticam subisset, morte plecti.*

plecti. In Greco est, ῥ' φορεῖον : *gestamen*. Quod commune nomen est, & plurimum *Lecticam* aut *Sellam* signat : atque ita latas, cum mos suadet, tum Ambrosij de ipsis verba : *Pompa lectica, ministrorum circumfusa comitatu*. Sed addo, & *Pilento* siue *Carpento* plurimum *vestas*. Prudentius;

Contra
Sym.

*Fertur per medias, ut publica pompa, plateas
Pilento residens molli.*

Tacitus : *Suum quoque fastigium Agrippina altius tol-* xii. Ann.
lere, carpento Capitolium ingredi: qui mos sacerdotibus* Vide me*
& sacris antiquitus concessus, venerationem augebat fa- in Com-
mina. Sacerdotibus, nempe istis Vestæ, sed & Flamini- ment.
bus olim. Liuius : *Ad Fidei sacrarium Flamines bigis,* Lib. i.

curru arcuato, vehi iussit. Quis ille currus arcuatus? car-
pentum, id est tectum superne, & cameræ in modum. Ta-
lia enim hæc fuisse, Numini hodie dicunt, qui plures ex-
stant: neque à *Thensâ* nimis diuersum fuit. Id quoque
enim vehiculum sacrorum. Quia igitur ita tectum, &
velut solidum perfectumque vehiculum; Dio Cassius
dixisse videtur & circumscripsisse, ἄρμα ὄλον. Vt in ho-
noribus Iulio Cæsari, tamquam Deo decretis : ὅς ἐστιν ὃ Lib. xlii.

ἄρμα ὄλον ἐν ταῖς ἱπποδρομίαις, μετὰ τῶν θεῶν ἀγαλμάτων,
πέμπεται ἔγνωσαι : Denique ὃ currum integrum, siue
Thensam, unâ cum Deorum statuis, in Circum inferri
decrerunt. Simile in libro sequenti, de eodem Iulio : καὶ
ἐν ταῖς ἱπποδρομίαις ὄχλον εἰσαγεῖται ἐψηφίζαντο : Legen-
dum videtur, ὄχον ὄλον, ex prior loco : si tamen lectio
illa certa. Id esset : *Et in Circensibus thensam introduci
consueverunt*. Suetonius ad ista : *Quedam amplior a huma-
no fastigio decerni sibi passus est, Thensam ὃ Ferculum*

E

Cir-

Circensipompâ. Itaque non nimis diuersa (quoad formam) *Thensa*, *Carpentum* siue *Pilentum*: sed prius illud diis adtributum, alia eorum etiam ministris. Sed ad Vestales. quid ergo vult Plutarchus? *Siquis subisset*, inquit. nōne per proteruiam aut ludibrium, & quasi velandis illis reuelandis? Apparet hoc facitatum ab improbulis, in matronarum transuersione: sed hîc, honori Virginum, morte vindicatum.

CAP. XII.

Item ornamenta aut insignia: ut Vitta, Purpura in veste, Stipendia & Agri, Auctoritas in deprecando.



¶ TQVE isti honores siue prærogatiuæ ex Plutarcho: alias alibi repperi, opportunè adtexendas. Sicut in ipso cultu aliquid eximium. inprimis *Vitta* in capite, ut in Deo Deæve consecratis. Prudentius:

11. contra
Sym.

-sedet illa verendis

Vittarum insignis phaleris.

Idem explicat:

-cingunt

Tempora taniolis, & licia crinibus addunt.

Ouidius, de Illiâ iam comprehensâ:

Decidit ante sacros lanea vitta focos.

Ingeniosè. quasi non iam Vestalis, amissâ virginitate, nec dignanda illis insignibus. Sic Dionysius scripsit: *Licere nubere, post annos impletos, ἀλλ'*, inquit, *δοθέντας τὰ σέμματα, καὶ τὰ λοιπὰ τ' ἱεροῦνός τεύχεα*: sed depositis vittis, & qua alia sunt Sacerdotij insignia. Quæ igitur alia?

alia? In Ambrosio aliquid: *Insula vittati capitis, purpuratarum vestium murices*. Nota & vestes purpuratas fuisse: nempe prætextâ eas vîas, id est limbo in oris purpureo. Nam ita Magistratus, atque item (ex Liviio aliis-que) Sacerdotes. Ergo & Vestales, vt suprâ in *Suffibulo* obferues. Non pugnat cum istis Suidas, qui scripsit: Οὐ μύρω, οὐκ ἀσπersion, οὐχ ἱματίω χερσὶν αὐτοῦ περιχέοντο πλεονάζοντες: *Non unguento iis, non floribus, non veste vti concesserunt, nisi albâ*. Quæ vera sunt, & inducta contra lasciuia: sed purpuratas eas, non purpureas dicimus fuisse. Veste albâ vîæ, sed limbo, vt diximus, punicante: non tamen floridâ, aut variegatâ, vt alie solent. In catbaso etiam aut tenui lino fuisse, ex Valerio, & Dionysio aliquis dicat: vbi de Æmiliâ Vestali. Dionysius quidem: *auulsiſſe εὖ defregiſſe ait, ἀπὸ τῆς καρπασίνης ἐδῆρες, ὡς ἐτυχεῖν ἐδεδυκῖα τὴν τελαμῶνα*: à carbasinâ suâ veste quam indutui habebat, laciniâ, & imposuisse Aræ. Nec de cultu alia habeo: nisi placet addere, longo capillitio fuisse, & sparso eo incessisse: è Prudentio colligendum.

Perfundunt quia colla comis benè, vel quia cingunt

Tempora taniolis.

Etſi ambigas an non tonderi ſolitæ (ritu noſtrarum Virginum quæ Deo ſacrantur) ex Plinio: *Antiquior eſt lo-* Lib. xvi.
cap. xliii.
tos, quæ capillata dicitur, quoniam Virginum Veſtaliũm ad eam crinis deſertur. Et Feſto: Capillatam vel Capitlarem arborem dicunt, in qua capillum tonſum ſuſpendebant. Semel igitur tonſæ, atque in ingreſſu, opinor: aliâs comam alebant. Sed præter hæc Ornamenta aut Inſignia, res & fructus etiam accedebant: id eſt, Stipendia & Opes. Liviũs, de ipſo Numâ: *His ſtipendium de*

publico statuit: ut vacuæ scilicet ab aliis curis, Deæ & sacris operarentur. Et credo agros à Numâ adtributos, quorum vectigalibus alerentur. Incertus auctor, de Limitibus: Ut nominibus vetustis videntur. ut, vectigalis ager Virginum, Vestearis: nempe, non Vestalis, ut vulgo. Hyginus item, de Limitibus: Virginum quoque Vestalium & sacerdotum quidam agri vectigalibus sunt redditu locati. Sed & Augustus adiecit. de quo uni-

Cap. xxxi

uersè Suetonius: *Sacerdotum & dignitatem & commoda auxit, PRÆCIPVE Vestalium virginum.* Aliquid in Catalogo Coloniarum, quem scriptum vidi: *Lanuuium muro cinctum, colonia deducta à D. Iulio. Ager eius, limitibus Augustais, pro parte est adsignatus militibus veteranis, & pro parte Vestalium, lege Augustianâ, fuit.* Imò & alios agros habuerunt, à priuatis pietatis ergo (ut hodieque solet) legatos: quos omnes Fiscus eripuit sub Valente & Theodosio Principibus, inuidiosâ & disertâ sanè Symmachi querelâ: *Agros etiam, inquit, Virginibus & ministris deficientium voluntate legatos Fiscus retentat.* Plura addit, atque arguit: & Ambrosius noster contrâ obducit: *Sola sublata sunt pradia, quia non religiosè utebantur iis, quæ religionis iure defenderent.* Sed præter Agros, video & Pecuniam interdum cepisse. Tacitus, de Tiberio: *Cornelia Virgini, qua in locum Scantia capiebatur, HS. vicies dedit. quæ sunt nobis, quinquaginta Philippaorum millia.* Hem, vni virginis sic fuit. nec immeritò obiicit iis Ambrosius, *Priuilegia maxima, LV CRA ingentia.* Atque inter Priuilegia, addamus: etiam ludis certo & honestissimo loco spectasse. Suetonius: *Virginibus Vestalibus locum in theatro separatim, & contra*
Præ-

In Aug.
cap. xliiij.

Prætoris tribunal, dedit Augustus: de quo nostra in Amphitheatro, sis, vide. Denique, ut finiam, Auctoritas earum maxima, & in precibus, aut aliâ re, vix repudianda. Cicero, cum pro Fonteio causam diceret, sororis eius Vestalis intercessionem usus: Superbum sit, inquit, eius obsecrationem repudiare, cuius preces si Dii aspernarentur, hac salua esse non possent. Atque inter exempla est Claudia Vestalis, quæ fratrem iniussu populi (in Suetonio) triumphantem, adscenso simul curru, usque in Capitolium prosecuta est, ne vetare aut intercedere cuiquam Tribunorum fas esset. Adeo & leges & magistratus reueriti sunt hanc impotentem, ut sic dicam, potestatem. Adde Suetonium in Iulio, cap. 1. in Vitellio cap. xvi. Tacitum 111. Historiarum, & plures.

Tiber.
cap. 11.

CAP. XIII.

Contra, Pœna cum peccassent, cum auro varia: sed solennis & nobilis à Tarquinio Prisco. Pontifices arbitros fuisse: conuictam, defossam: & quæ huic rei.

HÆC Præmia igitur, sed Virginum: nam pollutarum Pœnæ etiam grandes & graues. Vetus lex iuit, Festo prodita: *Probrum virginis Vestalis ut capite puniretur, vir qui eam incestauisset, verberibus necaretur. Lex fixa in Atrio libertatis, cum multis aliis legibus incendio consumpta est, ut ait M. Cato.* Sed cuius hæc lex? credam Numæ regis, qui simpliciter statuit *incestam lapidibus obrui, sine aliâ supplicij pompâ: in Cedreno scriptum.* Alia autem Albæ, ante Romam conditam: *quæ iuberet pollutam virginis ad necem cadi,* Dionysio

nyfio in rebus Iliæ tradente. Sed Tarquinius Priscus, qui numerum earum auxit, idem & pœnam, & conspicuam magis horrendamque fecit. Sic enim in Zonarâ: *Vestaliū corruptam unam, specu subterraneo oblongo excavato, atque ibi lectulo posito, & lucernâ, & mensâ cibis refertâ, deducunt ibi eam multis, viamque includens obstruxit. Et sic deinceps pollutas puniri obtinuit. Qui autem polluerint, in lignum biceps, siue in furcam, collum inferunt, in ipso foro: atque ita ad necem eos cedunt.* Dionysius pariter ad Tarquinium refert, & primam sub eo Pinariam quandam supplicio isto affectam. Quod vberius clariûsque tamen narrat, & verba eius digna apponi. *Pœna, inquit, delinquentibus graues constituta: quarum arbitri & exactores sunt, ex lege, Pontifices. Qui virgis quidem cadunt compertas leuioris delicti: probrosas verò & incestas fœdissimo & maximè miserabili maculant supplicio. Viua enim, funebri ritu & pompâ, efferuntur: amicis ac cognatis, cum luctu & lacrimis, comitantibus. Delata autem ad portam Collinam, intra muros, subterraneâ in cellâ, cum funeralibus ornamentis, deponuntur: nec monumento porro dignata, nec parentalibus, aliisque sollennibus defunctorum. Ita Dionysius: inhæcamus paullum, & magis etiam diffundamus. Ait, Pontifices arbitros. quod in omni eorum culpâ siue delicto obtinuit, causamque apud hoc tribunal dixerê. Liuius: Postumia Vestalis de incesto causam dixit. ampliata, deinde absolutam, pro collegij sententiâ Pontifex maximus abstinerere iocis, colique sanctè potius quàm scitè iussit. Nota obiter, & iocos & cultum scitiorum vetita. Quo adspectu Declamatores Vestali dicam*

dicam ob carmen istud scribunt: *Felices nuptæ. moriar,* Senec.
nisi nubere dulce est: & addunt, *Tu carmen scribas, tu* lib. vi.
verba pedibus suis emollias, & seueritatem templo debi- Controu.
tam modulatione frangas? Atque ibidem ostenditur, *om-* ult.
nis cultus luxuriosior, conuersatio cum viris licentior, iis
interdicta. Amplius nota, Pontifices omnes, id est col-
legium iudicasse: Pontifice tamen maximo conuocante,
& præfidente. Plinius: *Cum Corneliæ Maximæ* Li. iiii.
Vestalem defodere viuam Domitianus cupisset, ut qui epist. xi.
illustrari saculum suum eiusmodi exemplo arbitraretur:
Pontificis maximi iure, seu potius immanitate tyranni,
licentiâ domini, reliquos Pontifices non in Regiam, sed
in Albanam villam conuocauit. Vbi hoc culpat, non
Pontifices conuocatos, sed in talem locum, id est Alba-
nam villam: cum solenne esset, in Regiam conuenire,
quæ adlita templo Vestæ. Ad hanc Pontificis maximi
cognitionem Statius respexit, Domitiano blandiens:

Templa superfulges, & prospectare videris,
An noua contemptis surgant pallatia flammis
Pulchrius? an tacitâ vigilet face Troicus ignis,
Atque exploratas iam laudet Vesta ministras?

In Equo
Domit.

Itemque Ouidius:

Si mihi bellandi pater est, Vestaq; sacerdos

v Fast.

Auctor, & vlcisci nomen utrumque paro.

Quæ facit Augustum dicere, parantem vlcisci mortem
Iulij, & Patris sui, & Pontificis maximi. Neque enim
aliud voluit, cum *Vestæ sacerdotem* scripsit: curantem sci-
licet huic Deæ, & sacra eius tuentē. Lego & in lapidibus:
PONTIFEX VESTÆ. quo sensu? an quia proprius ali-
quis ei fuit? Præter hunc Maximum, Romæ nemo: &
magis

magis fortasse sit tales titulos ad prouincias coloniasque referri: vbi cum nullæ Vestales, Pontifex aliquis & velut Flamen proprius ei deæ fuit. Moneo etiam, inferiore æuo aliquid huic Pontificio detractum. & cognouisse quidem de culpâ, pœnam tamen non exegisse: quæ Præfecto vrbis referuata fuit. Disces è Symmacho clarè: qui

Lib. ix.
epist. cxx-
ii. & seq.

atate proximâ id institutum ostendit, id est Christianorum Principum aliquâ lege, nisi fallor. Sed ad Dionysium. addit: *Funebri pompâ efferri*. quod Plutarchus etiam expressiùs: *Lectica inditam per Forum deferri, clausâ undique & loris reuinctâ, ut nec vox eius possit exaudiri*. Atque hoc de Foro, alibi item Dionysius, vbi

In Numâ.

Lib. viii.

de *Opimiâ* Vestali (Liuius est *Oppiâ*;) *quam Pontifices, inquit, damnarunt, & demptis è capite vittis, per Forum traduxerunt, viuâque defoderunt*. Vbi & Vittas atque ornamenta vides ablata, quia scilicet poluisset. Ouidius:

Nullaq̃, dicetur vittas temerare sacerdos

Hoc duce, nec viuâ defodietur humo.

Pergit Dionysius: *Amicos cum luëtù comitatos*. Plutarchus autem, non amicos tantum, sed *totam ciuitatem in luëtù & gemitu ponit, neque vllam in eâ diem tristiozem*. Obuios autem *viâ decedere, vasto ubique silentio, attonitosq̃ omnes stare, aut comitari*. Ampliùs Dionysius: *Ad portam Collinam delatas ad locum nempe, qui Sceleratus campus, idè dictus. Festus: Sceleratus campus proximè portam Collinam, in quo virgines Vestales, quæ incestum fecerunt, viuâ defodiuntur*. Item Liuius: *Eo anno Mucia Vestalis, factò indicio, viuâ sub terrâ, ad portam Collinam, dexterâ viâ stratâ, defossa Scelerato campo.*

campo. ab incesto id ei loco nomen factum. Plutarchus describit, *superciliosum & tumidum eum locum esse, & Latinâ voce Aggerem dici.* De quo Aggere (nec enim alius iste est) ego pluscula De Militiâ Romanâ in occasione scripsi, etsi non totum Aggerem huic vsui applicamus: proximam portæ tantum eius partem. Pergit Dionysius: *In subterraneâ cellâ.* Græcè dixit οἶκον ὑπὸ γῆν κατεσκαυασµένον: *adiculam sub terrâ structam:* sicut Plutarchus οἶκον κατὰ γῆν, alibi οἶκον α, at Plinius *cubiculum* dixere. Amplius: *Cum funebribus ornamentis.* quod accipio, ipsam vt cadauer velatam & cultam. Zonaras supra dicebat, *Lectulum appositum, & lucernam, & mensam cum cibus.* De lectulo, nescio: nisi si velut funebris fuit, vsui quem dicam. De aliis, Plutarchus etiam addit, qui *lucernam ardentem, panis modicum, aqua & olei,* scribit deposita: *resacratissimum illud corpus viderentur fame consumpsisse.* Dionysius deinde, *in eâ cellâ deponi.* Hoc est, quod Satyricus:

Lib. v.
Dial. xiiij.

In Numâ
& Quæst.
Rô. xcvj.

Sanguine adhuc viuo terram subitura sacerdos.

Quod tamen priusquam fieret (ex Plutarcho) Pontifex maximus arcanas quasdam preces, manibus in calum sublatis, fundebat: tum ipse suâ manu eductam è lecticâ in scalis constituebat: & sic carnifici ac ministris supplicij tradebat. Plinius item de Corneliâ: *Cum in illud subterraneum cubiculum demitteretur, hasisset q̃,* (nempe in scalis) *descendenti stola, vertit se ac recollectit. cumque carnifex manum daret, auersata est & resiliuit, sedumque contactum quasi planè à casto puroq̃ corpore reiecit.* Atque his gestis, ait Plutarchus, *scale attrahuntur, & adicula multâ humo iniectâ contegitur, donec reliquo ag-*

geri solum adequetur. Sed vinctam illam ibi, aut stantem sedentemve obrutam, nemo declarat: putem in lecto depositam, de quo ex Zonarâ dixi. Claudit denique Dionysius: *Nec monumento, nec Parentalibus dignatus.* Et de monumento vel ideò monendum, quia inculpatâ in hoc quoque eximîæ, & *Vestalium cineres* (ait Plutarchus) *in Foro ipso recondi fas erat.* At de Parentalibus, controuertat aliquis ex eodem Plutarcho, qui scribit: *defossâ Vestali, ne sic quidem Romanos qui euissent, religione liberos:* atque ad eò μέλει, νῦν, inquit, ἐναγίζουσιν οἱ ἱερεῖς βαδίζοντες τῇ τὸν τόπον: *vsque ad hoc aui Pontifices parentant, ad locum ipsum euntes.* Sed quamquam vterque eodem verbo ἐναγίζουσιν vtatur, putarim Plutarchum potiùs ad Expiationes aut Procuraciones, quàm ad vera Parentalia referendum. Habes supplicium, & causam eius ex Ouidio:

Quæst.
Rom.
xcvi.

vi. Fast.

Sic incesta perit. quia quam violauit, in illâ

Conditur: & Tellus Vestâque numen idem est.

Etsi duplex etiam alia in Plutarcho. Vel, quia igne Romani mortuos cremant: igne autem funerare eam, qua Ignem parum castè coluit, iniquum erat. Vel, quia corpus maximis consecratum ceremoniis occidere, aut manus mulieri adferre, nefas putauerunt. Sub terram igitur condi, cum victu apposito, ut quasi sponte exanimata videretur. Atque hæc sollennia: Principes interdum immutarunt, aut mitigarunt. vt Domitianus: qui incesta Vestalium virginum (Suetonij verba) *variè ac seuerè coercuit: priora* (sub patre aut fratre admissa) *capitali supplicio; posteriora* (suo Principatu) *more veteri.* Addit deinde, prioribus liberum mortis arbitrium permisissè;
Corne-

Corneliam virginem Maximam defodi imperasse: stupratorésque virgis in comitio ad necem cadi. Quod postremum de Stupratoribus, Zonaras è Tarquinij etiam lege fuisse ostendit. Apud Declamatores reperio, In- Sen. 1.
Controu.
112.
cestam de saxo deiici: sed scholicâ, opinor, & fictâ lege.

CAP. XIII.

Quando Vestales desierint? in Arnobio nodus, nec solutus.

FINIVI de Vestalibus: quæ & ipsæ finem suum sub Christianis mox Principibus inuenerunt. Quando? extremo Theodosij senioris æuo. Nam etsi concussæ antea, & periclitatæ sub Valentiniano, *Theodosio, Arcadio, quod ex Symmachi & Ambrosij epistolis constat: tamen animam traxêre ad vltimum Theodosij, id est, decimumseptimum Imperij eius annum: cùm ille *templa claudi, & sacrificia tolli* lege iussit. Præter alios, Zosimus clarè: *Theodosius maior, e-* * Is fuit
sextus
Theodosij
annus.
uersâ Eugenij tyrannide, Romam venit, & contemptum religionum in animis omnium excitauit, publicum sumptum ultra dare ad sacrificia abnuens. Pellebantur utriusque sexus sacerdotes, & sana sacrificiis abolitis deserta relinquebantur. Hæc ille. & lapides atque inscriptiones etiam testificantur, Vestales ad hoc æui circiter perseuerasse. Itaque mirum, bis mirum, Arnobium doctum illum res veteres scriptorem, ignem perpetuum inter abolita aut desita iamdiu habere. Ita enim Ro- Lib. 2.
17. Adm.
Gent.
manos alloquitur, & arguit, identidem in alios mores ac

F 2ritus,

ritus, priorum condemnatione, transisse. Tum adiungit & adstruit: *Numquid magistratus per populum creatis? in potestatibus obeundis leges conseruatis Annarias? in penetralibus Vesta ignis perpetuos seruatis focos?* quas interrogationes omnes negandi mente suscipi, palàm est. Atquin Arnobium Diocletiani temporibus vixisse & scripsisse, id quoque palàm est: id est; centum circiter ante Theodosij finem annis. Quis hæc defendit, aut soluit? nam vel maximè tunc sacra viguisse, Principibus eorum ex professo assertoribus, nemo negat. Quid etiam Symmacho & Ambrosio fiet, aliter proclamantibus? quid ipsi Arnobio in Arnobium dicenti? Nam ita in iisdem libris: *Sedent in spectaculis publicis sacerdotum omnium magistratuumque collegia, nec non & casta Virgines, PERPETVI nutrices & conseruatores IGNIS.* De suo æuo dicit: nec ego, quid de priore loco dicam aut valem, habeo: manum tollo, & auxilium specto.

Lib. III.

CAP. XV.

Alibi Ignis cultura, & simulacrum Vestalium.

Leuit.
cap. vi.

VBET autem pro Corollario addere, vbi locorum præcipuè cultus etiam Ignis, siue imago aliqua Vestalium fuit. Apud Iudæos primùm. & Dei iussio: *Ignis in altari semper ardebit, quem nutriet sacerdos subiiciens ligna manè per singulos dies.* Et mox: *Ignis est isæ perpetuus, qui numquam deficiet in altari.* Habuere & Ægyptij. ac Diodorus vult seruandi ignem perpetuum, caelesti similem, morem ab illis natum, &

ad

ad alias gentes propagatum. Item Afri & Plutarchus auctor, in Iouis Ammonis *λύχνον ἄσβεστον*, siue *lucernam* De Defe-
ctu orac. *inextinctam* arsisse. Silius videtur & in Arâ flammâ statuere, vbi de hoc templo:

Inextincta focus seruant altaria flamma.

Lib. III.
initio.

Apud Indos, Ammianus: *Brachmanes serunt, si iustum est credi, ignem calitus lapsum, apud se sempiternis focolis custodiri.* In Persis simile. & verba Procopij:

Lib. xxij.

Magnum hic Pyraum est (πυρεῖον, focus, siue Vas igniarium) quod Persæ inter omnes Deos maximè venerantur: vbi ignem perpetuum custodiunt Magi. Hic est

Lib. II.
bell. Pers.

Ignis, quem Vestam olim Romani vocabant. atque alij plures de hoc Igne. Idem apud Cappadoces. Strabo: Εἰς πυρεθεῖα, σπκαὶ πνεῖς ἀζιόλογοι. ἐν τῷ τοῦτοῖς μέσσις

Lib. xv.

βωμὸς, ἐν ᾧ πολλή τε ἀποδὸς, καὶ πῦρ ἄσβεστον φυλάττειν οἱ μάγοι: Sunt Pyraethæa, facella quedam modica: & in iis mediis Ara, in quâ cinis multus, & Ignem inextinctum Magi seruant. Iam in Græciæ Ptytanæis, Pausanias sæpe commemorat ipsam hanc Vestam & æternum focum, itemque Athenæus, & alij: iterumque distinctè, Mantinea in templo Cereris, Athenis, in Minervæ; Delfis, in Apollinis.

Imò & Virgines ipsas aliquot locis habuere. Tertullianus: *Noneram virginis & Vestæ, & Junonis apud Achaia gæcum, & Atrocis*

E. h. o. v.
ad castit.
cap. vlt.

apud Delphos, & Minervæ, & Dianæ. Et quem hic Atroceum, Apollinem interpretatur & indigetat De Monogamiâ idem scriptor. Dubitet aliquis, an non Atrecem, id est ἀρετὴν siue Veracem, à diuinandi calliditate voluerit dictum. Video & Persas Soli virgines sacrasse. de quibus Iustinus: Artaxerxem regem, ne

Lib. II.

P. Cicca,
& Augu-
stinus Ca-
saca.

Aspasiam pellicem filio daret, & honestè negaret, quod temerè promiserat, Solis sacerdoti profecisse, quo perpetua illi ab omnibus viris pudicitia imperabatur. Simillimum nuper, priusquam Hispani Regi & Religioni subegissent, in toto Perüano tractu. vbi crebra & magna templadicata Soli, & in iis virgines saepe ducentas fuisse tradunt qui viderunt: è quibus si qua corpus polluisset, morte luebat, nisi tamen è Sole se concepisset, (ride credulitatem supersticiosam) sanctè adiurasset. Satis de Vestâ & Vestalibus: quas olim nobiles, sed æuo obscuratas, iterum in lucem protraximus, bono (ita confidimus) veterum scriptorum.

*Inscriptiones aliquot de VESTALIBVS in
memoriis priscis.*

Romæ, in basi, cui Statua olim superposita.

* Virgini
Vitali
Maximæ.
* Sacerdot.

NVMISIAE. MA
XIMILLAE. * V. V.
MAX. TI. IVL. BAL
BILLVS. * S. SOLIS
DEO. IDIB. IAN.
L. ANNIO. FABIANO
M. NONIO. MUCIANO COS.

In urnulâ sepulchrali.

D. M.
TEIAE. EUPHROSINES
RVFINAE. V. V.
DELICATAE.

In basi.

COELIAE. CLAVDIANAE

V. V. MAXIMAE.

A. DIIS. ELECTAE. MERITO

SIBI. TALEM. ANTISTITEM

NVMEN. VESTAE. RESERVARE

VOLVIT.

COELIA. NVMERIANA. SOROR. VNA

CVM. PIERIO. CONIVGE. AC. LIBERIS

SVIS. ORANTES. VT. PER. TOT. SECVLA

FACERE. DII. PERMITTANT.

* Quot
népe ipsi
cū liberis
essent.
Egregia
adulatio.

Romæ.

*CLOELIAE. CLAVDIANAE

V. V. MAX

RELIGIOSISSIMAE. BENIGNISSI

MAEQVE. CVIVS. RITVS. ET. PLENAM

SACRORVM. ERGA. DEOS

ADMINISTRATIONEM

VRBIS. AETERNAE. LAVDIBVS

*S. S. COMPROBAT. OCTAVIA

HONORATA. V. V. DIVINIS

EIVS. ADMONITIONIBVS

SEMPER. PROVOCATA

COLLOCATA. XII. KAL. APRIL

C. AVFIDIO. ATTICO

C. ASINIO. PRAETEXTATO

COS.

* Supra
Celia:
si tamen
eadem.

* Sanctiss
Genatue.

Romæ,

Romæ, trans Tiberim, item in basi.

TERENTIAE

FLAVOLAE. V. V.

MAXIMAE

AVREL. IVLIVS. BAL

BILLVS. SAC. SOL

OB. PLVRA. EIVS

IN. SE. MERITA

D. D. PR. NON. APRIL.

LAETC. II. ET. CERIALE

COS.

Romæ.

TERENTIAE. RVFILLAE

V. V. MAX.

DED. PRID. NON. MAI

TITIANO. II. ET NEPOTIANO

COS

*CVR. AVRELIO. NICETA.

* CAVENDI

Romæ.

FL. MANILIAE. V. V. MAX.

CVIVS. EGREGIAM. SANCTIMO

NIAM. ET. VENERABILEM

MORVM. DISCIPLINAM

IN. DEOS. QVOQVE. PERVIGILEM

ADMINISTRATIONEM

SENATVS. LAVDANDO

COMPROBAVIT

AEMI-

AEMILIVS. FRATER. ET
 RVFINVS. FRATER. ET
 FLAVII. SILVANVS. ET
 EIRENEVS. SORORIS. FILII
 A. MILITIIS. OB. EXIMIAM
 ERGA. SE. PIETATEM
 PRAESTANTIAMQVE

Ibidem.

FL. PVBLICIAE. V. V. MAX.
 SANCTISSIMAE. ET. PISSIMAE.
 AC. SVPER. OMNES. RETRO
 RELIGIOSISSIMAE. PVRISSIMAE.
 CASTISSIMAEQVE.
 CVIVS. RELIGIOSAM. CVRAM
 SACRORVM. ET. MORVM. PRÆDI
 CABILEM. DISCIPLINAM.
 NVMEN.QVOQVE.VESTÆ.COMPROBAVIT.
 Q. VETVRIVS MEMPHIVS. V. E.
 *FICTOR. V. V. DIGNATIONIS. ERGA. SE
 HONORISQVE. CAUSA. PLVRIMIS
 IN. SE. CONLATIS. BENEFICIIS.

* Scripsi
 11. Elect.
 cap. xviii.

Ibidem, de eadem.

FL. PVBLICIAE. V. V. MAX
 MERITO. SANCTISSIMAE. AC. PISSI
 MAE. QVÆ. RITE. ET. PERVIGILI. ADMINIS
 TRATIONE. OMNES. GRADVS. LAVDE
 CVMVLATA. SACRA. SVA. VENERATA. VI
 VIT. VT. SECVLARI. ÆTATE. ET. MINISTERIO
 ADSIT. ET. IN. FVTORO. PERSEVERET

G

Q. TEREN.

50 I. LIPSII DE VESTA ET VESTAL. SYNT.
Q. TERENTIVS. RVFVS. ET. CÆNIA
VERISSIMA. PARENTES
TERENTIÆ. RVFILLÆ. V. V.
CVIVS. MVLT. TEMPORIS. BONITATEM
ET. HVMANITATEM. EIVS. CIRCA. SE
IN. BREVI. SENSERVNT.

Ex his talibus vides adulationes laudesque erga *Vestales Maximas*: apparetque magnas iis opes fuisse, ut dixi, & administrationem permissam, copiamque benigne faciendi. Aiunt & ante annum erutas Romæ inscriptiones, statuasque: videre mihi nondum fuit. Addat, si quis nanciscetur: quod idem de *Numis* potest. Nam & pluresculi sunt, qui has spectant.

F I N I S.

APPROBATIO.

Syntagma istud dignum luce est, quod ad Priscorum lucem conferat plurimum. 7. Calend. April.

Guilielmus Fabricius Nouiomagus Apostolicus
ac Archiducalis librorum Censor.

PRIVILEGIUM CÆSAREVM.

RVDOLPHVS SECVNDVS diuina fauente clementia electus Romanorum Imperator semper Augustus, ac Germaniæ, Hungariæ, Bohemiæ, Dalmatiæ, Croatiae, Sclauoniæ Rex, Archidux Austriæ, Dux Burgundiæ, Stiriz, Carinthiæ, Carniolæ & Wirtembergæ, &c. Comes Titolis, &c. Nostro & Sacri Imperij fidei dilecto **I V S T O L I R S I O** gratiam nostram Cæsaream. Postquam inter alia, quæ **D E V S** immortalis hominibus liberali manu dedit dona, illustria inprimis illa & quasi diuina sunt, quæ in literis liberalibusque disciplinis consistunt, quibus scilicet homines non tantum ab animalibus ceteris rationis expectibus, sed à rudi etiam & impento hominum vulgo ita distinguuntur, vt tanquam Dij quidam splendescere in terris videantur: rem sanè præclaram seque dignam illi præstant, qui diligentem iis ipsis in literis ac disciplinis operam ponunt, præclarissimam verò & Reipub. vtilissimam, qui eas ita excolunt, vt aliorum menti docendo, scribendo lumina præferant, eosque ex ignorantiz tenebris quasi manu educant. Quos excitare, quos amare atque animare ad dignitatis nostræ munus, ad quod Diuino vocati beneficio, concessuque sumus, inprimis pertinere existimamus. Cum itaque ab iis, quorum nobis spectata fides, qui que iudicare de Literis possint, acceperimus, insignes & animi ingenique tui doctes tibi à natura insitas à primis temporibus ætatis tuæ ita literarum ac disciplinarum studiis excoluisse atque exornasse, vt olim iuuenilibus adhuc annis præclara florentis minimeque vulgaris eruditionis specimina præbueris, dum obscura in antiquis scriptoribus loca, quæ quædam tanquam lustra erant, illustrasti, quæque in iis iniuria temporum deprauata & corrupta fuerunt, restituisisti, dum vetusta Latine antiquitatis rudera in nouam subinde structuram singulari artificio eleganter conuertisti: ad exquisitam aded & raram doctrinam, quæ magnam de te apud doctos quosque viros opinionem excitari, peruenisse, eamque variis abs te libris acri & graui cum iudicio scriptis atque in lucem editis ostendisse, vt in eo quod tam feliciter tractas scriptiōnis genere paucos tibi pares hodie reperire sit: iam verò matura te ætate virum, viro magis magisque digna, & vitis doctis grata ac Reipub. vtilia scribere, quæq; à primis illis Romanis olim auctoribus scripta fuerunt, à mendis purgare, & lectissimos quosque ex Musarum hortis, in quibus assidue versens, flores colligere, concinnare, quibus Lectores mirifice recrees, & eorum pectus ad prudentiam, probitatemque informes: haudquaquam prætermittere volumus, quin Reipub. ad quam hæc abs te ornamenta conferuntur, causa, Cæsareo te nostro elogio decorandum, & quamuis per te sanis ipse animatus sis, animadum magis patrociniōq; nostro defendendum pro benigna nostra in te susciperemus voluntate. Quoniam verò lucubrationibus atque operibus tuis in lucem edendis, peculiarem te eligere velle Typographum, acceperimus. Diplomate hoc nostro privilegioque te & Typographum tuum aduersus quorumcunque fraudem, qui lucri causa, quod fieri solet, eadem excudere aut typis imitari nostra velint, munitos cupimus. Quamobrem pro auctoritate nostra Cæsare a decernimus, statuimus, vetamusque, ne quis Typographorum, Bibliopolarum,

aut aliorum, qui librariam negotiationem exercent, eos libros, quos tu editurus es, quocunque modo charactere, aut forma, siue integros, siue aliquam eorum partem typis imitari, edere, excudere, aut venundare intra sacri Romani Imperij, Regnorumq. ac Dominiorum nostrorum hæreditariorum fines triginta annis proximis à primo editionis die computandis, absque tuo tuorumve hæredum consensu audeat. Hac autem lege addita, ut tria ut minimum cuiusque libri exemplaria, quemadmodum moris est, ad Imperialem nostram Cancellariam mittantur. Si quis verò edictum hoc nostrum transgredi, violare, aut contemnere deprehensus fuerit, eum non solum eiusmodi libris, tibi, hæredibusve tuis, auxilio Magistratus, ubicunq. reperti fuerint, vendicandis, priuari, sed triginta etiam Marcharum auri puri multa, cuius semissis quidem Fiscus nostri Procuratoris, fraudis vindici: alter verò semissis, tibi hæredibusve tuis pendatur, puniri volumus. Mandantes vniuersis & singulis nostris & sacri Romani Imperij subditis & fidelibus dilectis, tam Ecclesiasticis quàm Politicis, cuiuscumque status, gradus aut ordinis extiterint, præsertim verò iis, qui in Magistratu constituti, vel suo vel superiorum suorum loco aut nomine, ius dicunt, iustitiâmve exercent, ne quemquam hoc Priuilegium nostrum impunè violare, spernere aut negligere patiantur. Sed, si quos contumaces compererint, constituta à nobis multa, eos puniri & quibuscunque modis coërceri curent, ni & ipsimet grauissimam nostram in se conuertere indignationem velint. Id quod hoc Diplomate, manu nostra subscripto, & Cæsarei nostri sigilli impressione munito, confirmamus. Datum in arce nostra Regia Pragæ, die prima mensis Augusti. Anno Domini Millesimo, Quingentesimo Nonagesimo secundo. Regnorum nostrorum Romani decimo septimo, Hungarici vigesimo, & Bohemici itidem decimo septimo.

Subsign.

R V D O L F H V S.

Iacobus Curtius à Senftenaw.

Ad mandatum sacra Cæsarea M^{te} proprium.

Io. Baruitius.

Additum sigillum Cæs. M^{te} in cerâ rubrâ.



PHILIPPVS Dei gratia Hispaniarum, &c. Rex Catholicus, diplomate suo sanxit, nequis, Iusti Lipsij Historiarum in alma Vniuersitate Louaniensi Professoris, & item Historiographi sui libros quoscunque, à Censoribus legitimis approbatos, præter ipsius, heredumve eius, voluntatem, intra triginta annos à prima singulorum librorum editione computandos imprimat, aut alibi terrarum impressos, in has inferioris Germaniæ ditio- nes importet, venalésve habeat. Qui secus faxit, præter librorum confiscationem triginta marcharum auri puri illatione mulctabitur. Vti latius patet in litteris, datis Bruxellæ XIV. Febr. M. D. XCVII.

Verreycken.

Tibi JOANNES MORETE, pro amicitia qua mihi cum Plantino (heu, quondam meo) & Plantinianis est ac fuit, tibi, inquam, permitto, uti meum DE VESTA ET VESTALIBVS SYNTAGMA, typis tuis excudas ac divulges. Nequis alibi alius præter te, cupio siue iubeo, ex lege quam magnus Caesar & Rex meus dixerunt.

Iustus Lipsius.

ANTVERPIÆ,
EX OFFICINA PLANTINIANA,
APVD IOANNEM MORETVM.

CID. ICDIL



677049

3-

B.17.3.27

BNCI



